

那文毅公奏議

那文毅公兩廣總督奏議卷十三目錄

卷十三

勦撫洋盜

告示附

那文毅公兩廣總督奏議卷十三

上海市庫史文
獻圖書館藏

男
容安恭輯

勦撫洋盜
告示附

嘉慶十年九月初四日會同廣東巡撫孫公玉庭
奏爲續報著名盜首窮蹙投誠事竊臣等前將各路投
首盜匪三百八十七名口並籌議安置章程均經
具

奏在案臣等荷蒙

皇上指授機宜嚴辦勾通接濟匪徒絕盜之糧制盜之命
一面仍督飭舟師痛加勦捕水陸逼迫使其畏威

授命於辦理之機更爲得力查西路廣洲灣之賊
前經舟師會剿雖擒獲只二百餘人而當時擊沉
各賊大船實有七隻又獲船六隻統計殺傷淹斃
者不下五六百人賊匪向在廣洲灣寄泊盤踞肆
無忌憚從未經此痛剿至是賊始寒心四處竄逸
而廣洲灣之西又有東海村一處周圍三百餘里
居民稠密米穀富足半皆勾通接濟之人卽爲羣
盜窩聚之所如巨寇吳十一指者卽生長其地故
羣稱之爲東海伯鄭一劉唐伯烏石二等著名巨
匪亦係附近之人盤踞既深根株難拔自廣洲灣

賊散之後臣等以爲不可坐失機要正宜趁此將東海一路亦卽經營辦妥旋據代理遂溪縣段良基業已乘勢卽將東海地方又與廣洲灣接連之激沙渡白鴿塞舖仔墟水流溝那箇墟等處凡有消賊接濟之匪悉行拏獲一面解省究辦一面編查保甲并於要隘處所酌設礮臺礮樓勸諭鄉耆團練丁勇以資捍衛是東海肅清西路之賊失其巢穴該代理縣竟能如此辦理殊可嘉許臣等又於各路拏獲盜犯及投首人內訊據供稱自查拏接濟匪徒以來賊匪初未計及至五月後米糧絕

少然尙有船內餘糧近日漸有不給之勢每日僅得餽粥一餐因而互相怨尤現在偷販出口者雖不能盡絕偶有一二十石偷出者其初尙出貴價爭買至此時急切不能待買往往爭先劫奪以致私販不能獲利亦絕稀少又盜首擁資自給夥匪窮餓因而忿怨爭殺又近日各盜或因劫食上岸其被脅擄之人多有乘勢逃散其入心已不能自固又向來各著名大盜分佔地界行劫今因謀食過急因而踰界行劫互相爭併者亦有之臣等仍悉心籌辦又將先後投首之人或漁蛋線人不惜

重賞用間用謀益令惶惑猜慮一面催兵打仗通之以威更可速其來歸之念迺自前次奏報後旬日之間仰仗

皇上德威據各屬稟報著名盜首率衆投出各起有八百四十餘名口現仍上緊布置廣爲設法督率文武各員弁恪遵

聖訓共矢天良緝捕巡防始終不懈看來事機極其順利賊黨愈形瓦解其勢日削其技日窮似不難掃除淨盡永息海氛仰慰

聖主宵旰厪念查此次平海營叅將李光顯稟報投誠洋

盜大頭目林亞發一起本有船二十六隻與許雲相分管先於七月內求線人向同知南炎會轉稟臣等卽商令臬司吳俊密給諭帖許其免罪投誠并卽令其設法擒拏李崇玉爲贖罪之地該犯極其踴躍再又令千總王殿邦設法盤窩嗣因陡遭颶風與許雲相幫船飄散未能得手轉至風聲洶洶爲衆所仇厮併打仗失船六隻不能寄碇洋面隨同千總王殿邦前來投誠率領大開波船八隻舵工水手男婦三百四十一名口呈繳大小鐵礮五十一位烏鎗挑刀藤牌腰刀長短三百九十八

件火藥封口羣子沙子多件當卽劄委惠潮嘉道
蔣攸銛前往照料安插辦理又據海豐縣知縣張
再英碣石鎮右營守備李用率同縣丞戴玉衡鵝
埠司巡檢捐陞縣丞徐維珩典史程長發等稟報
盜首韓斗鳳一起卽係前次向知府楊楷等投誠
袁阿明等之分股袁阿明投誠之後韓斗鳳等船
被颶風飄散今聞袁阿明投誠得所駛赴鵝埠司
投誠其大船四隻舵工水手男婦二百零二名口
呈繳礮位器械共三百四十七件又據鵝埠司巡
檢徐維珩稟有張長貴沈四傳各帶船一隻共船

二隻舵工水手二共九十一名呈繳大小礮位十四門器械一百一十件前來投誠又據臬司吳俊稟有運商捐納職員鄧時宜稟稱有洋盜鄭一支之大盜首陳五帶船六號頭目六名散盜一百七十二名情愿投誠懇求漁船傳知派巡洗馬湖之約副王維綱轉告該商察其來意頗誠勸令先繳礮位器械代稟到司並由該商各給口糧候示等語又據惠州協副將何君佐稟據鄧時宜稟稱訪知盜首李福生係歸善縣人久有思鄉之意因令其弟職員鄧從龍前往勸令投誠詎大頭目張

大眼二洪羅順李亞八及安南人駱亞養賊心未
改欲拘留鄧從龍勒贖又欲用礮火攻擊鄧從龍
坐往之船幸李福生招呼同船盜夥曾亞滿等二
十七人同心救護將張大眼二等四名卽時殺死
割取首級二顆搬運器械上岸懇請投誠現在均
飭從化縣知縣李湛前往妥協安插辦理以上續
報五起共投首人八百四十名口查林亞發爲最
大頭目在洋十四載與鄭一劉唐伯烏石二等同
爲著名盜首據稱被風飄散之許雲相十二船將
來亦必設法招致等語又陳五亦係與鄭一分幫

之大頭目今與鄭一散夥來歸是此次投誠之匪
並非零星小幫可比人數既多自應密飭加意防
範不使滋生事端并委明幹員弁分投前往照依
前定章程逐一妥速分別料理安插並將出力招
撫之人先行優賞外其被殺梗議賊匪之首級仍
飭懸掛海口示衆以昭炯戒臣等伏讀前次欽奉
上諭仰徵我

皇上於恩威並濟之中仍寓

慎重名器之意臣等實不勝欽佩悅服茲值投首之人紛
紛接踵而至其中有僅止小夥賊匪窮蹙來歸者

不過貸其一死量爲安插不令失所至革心効順
率領夥衆又或能殺死梗議巨惡則其情畧有可
原臣等爲籌辦通省洋盜起見應

奏明請

旨加恩以爲風聲之樹所有此次圖功遭怨接仗捐船之
林亞發并蓄志已久率衆投誠之韓斗鳳二名又
首倡殺賊獻功之李福生一名可否仰懇

皇上格外

天恩均賞給千總頂戴候補又率衆數十人投首之張長
貴沈世傳及出力幫同殺賊之曾亞滿均請賞給

把總外委頂戴候補以廣招徠於洋面事宜實有裨益至此等洋匪狼子野心誠如

聖諭均係罪大惡極之人豈可濫邀

恩賞但爲一時權宜之計應暫寬其既往現在尙有可用之處將來果肯出力不妨驅使若稍有罪過卽當從嚴誅除倘竟仰賴

皇上天威大小文武齊心奮力得能迅速藏事則事後甄別裁汰亦尙易爲辦理臣等愚昧之見是否尙當伏候

訓示遵行謹

奏

嘉慶十年九月二十五日軍機大臣字寄奉

上諭那彥成等奏續報著名盜首窮蹙投誠一摺據稱洋盜林亞發等五起率眾投誠共有八百四十餘名口查此內林亞發陳五均係洋盜內著名頭目非零星小幫可比現俱分別料理安插不令失所請將盜首林亞發等數名分別賞給千總把總外委頂戴候補以廣招徠並將辦理出力員弁南炎曾等加恩鼓勵等語粵省洋盜前據那彥成等奏有投誠之事此次續又投出八百餘名其勢自益窮蹙看來該督撫督率辦理尙屬認真

此等獷悍匪徒爲惡已極今投出之後自當加恩收撫
但人數既多究難深信若謂此八百餘名俱心懷叵測
固未必然但竟云人人草面草心無一二反側之徒恐
亦難恃總之安插之法宜散而不宜聚那彥成等惟當
分投安置使之人少勢孤日後自無他慮並當傳集該
盜等諭以爾等皆屢經犯法罪在不赦今蒙皇上格外
天恩特加赦贖並令安插得所爾等當從此勉爲良善
若再稍有滋事不肯安分必當加倍治罪至爾等在洋
日久果能熟習水性情願効力並准爾等隨同官軍出
洋捕盜更可奮勉亦思爾等此次殺賊投誠圖功遭怨

已與羣盜爲仇勢難兩立惟有幫助官軍出力勦捕將其餘盜首等乘勢殲除爾等方免後患將來果著有功績卽當奏明陞獎如此剴切曉諭伊等自必知感知懼可收以賊攻賊之効至現在那彥成等請將伊等賞給千把外委之處未免過優所有請賞千總之林亞發韓斗鳳陳五李福生均著先賞給外委至請賞補把總外委之張長貴沈世傳曾亞滿均著先賞給額外外委毋庸給予頂戴將來果能緝捕立功再行量予陞擢可也
謹按嘉慶十年九月初四日會同廣東巡撫孫

公王庭奏內

奏出力員弁內除徐維珩一員前經保奏陞用其理瑤同知南俟曾甚著勞績應請

旨交部議敘運商州同職銜鄧時宜卽鄧兆龍捐貲購線用心招徠州同職銜鄧從龍親至賊船瀕危成事請

旨給予加銜頂戴代理知縣候補直隸州州判段長基等獲勾通接濟賊匪一百餘名所辦東海激沙等處編甲團勇方清賊巢其功誠不可沒應請以知縣用用示鼓勵出自

聖恩等奉敕直便謹

奏

謹按嘉慶十年九月二十五日廷寄內奉

上諭辦理出力員弁均加恩照那彥成等所請同知南爻
曾著交部議敘其捐貲購線之運商州同職銜鄧時宜
卽鄧兆龍及親往招撫之州同職銜鄧從龍均賞給加
銜頂戴又拏獲賊匪一百餘名清查賊巢之候補直隸
州州判段長基著以知縣陞用以示鼓勵

謹按嘉慶十年九月十二日會同廣東巡撫孫

公玉庭奏內

奏據歸善縣知縣康傑督率先後獲犯林亞啟等十一

名並獲火藥器械各物等情飭委員審明由司招
解前來臣等督同親鞫綠林亞啟曾亞敬張亞狗
三犯籍隸歸善新安番禺等縣該犯等據供俱係
被擄入夥前後在洋劫擄多次劉亞安一犯據供
被擄服役後遁脅在本船接贓一次並無隨同過
船搜贓情事陳亞羅陳亞長賴亞九陳繼受四犯
均據實供爲盜服役並無上盜接贓之事彭亞三
胡亞保二犯據供與病故之葉時仁均係代人向
盜求贖被擄人口未成委無接濟情事等語再三
究詰各供如一矢口不移似無遁飾各犯情罪重

大未便稍稽顯戮審明後臣等當卽恭請

王命飭委按察使吳俊督標中軍副將劉惟馨將林亞啟等三犯照江洋行劫大盜照響馬強盜例綁赴市曹斬決傳首沿海地方梟示以昭炯戒劉亞安係被脅服役後在本船接贓一次合依洋盜案內接贓一次例發黑龍江給打牲索倫達呼爾爲奴照例刺字陳亞羅等四犯訊止爲盜服役均合依被擄服役之犯如被拏獲者例杖一百徒三年至配所各折責四十板彭亞三等三犯並無接濟情事其向盜求贖係由事主囑托與串匪勒贖圖利者

迥異惟不報官查拏亦有不合應照不應重律杖
八十折責三十板遞籍交保約束胡亞保革去更
夫葉時仁已經病故應無庸議逸盜陳亞養等嚴
飭沿海營縣上緊嚴緝務獲究辦現獲火藥器械
分別留營備用變價充公謹

奏奉

硃批刑部速議具奏

嘉慶十年九月十二日會同廣東巡撫孫公玉庭
奏據兩廣鹽運使蔡共武候補鹽大使陶桂楨盤獲洋
匪陳亞耀一名併搜獲盜信等情飭委審辦茲據

委員將該犯陳亞耀并提集事主人証區益和等
三名審明由司招解前來臣等督同司道親加研
究緣陳亞耀籍隸番禺據供聽從未獲之鄧潮輝
駕艇出洋行劫後又投入盜首李璉逢船內入夥
前後在洋行劫擄人勒贖共六次殺死水手一人
該犯因攜帶銀兩潛至省河欲行購買食米登岸
被獲區益和何亞名二名據供係冒昧賣給盜匪
草席并代爲轉買貨物並非知情故賣亦不知陳
亞耀在洋爲盜情事張亞輔一名據供陳亞耀委
係擄捉伊鹽船內水手勒贖正盜前因人已贖回

急欲回省以免再被盜劫致未稟報等情屢鞠不移案無遁飾該犯情罪重大未便久稽顯戮審明後臣等當卽恭請

王命飭委按察使吳俊督標中軍副將劉惟馨將該犯陳亞耀照江洋行劫大盜照響馬強盜例綁赴市曹斬決傳首沿海地方梟示以昭炯戒區益和何亞名訊不知情但不查確實將貨物冒昧賣給并代爲轉買亦有不合均應照不應重律各折責陳亞耀父兄陳信先陳亞赤陳亞合陳亞安飭縣查拘照例責處陳信先年逾七十照例收贖追出贖銀

充公該犯訊無另有犯案事主張亞輔囚人已贖
回且急欲回省以免再被盜劫致未稟報應無庸
議盜信已經銷毀礮械來厯盜首李班逢在逃無
憑跟究逸盜李班逢吳亞八等飭行沿海營縣嚴
拏務獲究辦謹

奏奉

硃批刑部速議具奏

嘉慶十年九月十二日會同廣東巡撫孫公玉庭
奏據新寧縣知縣王志槐派撥兵役協同事主張清廣
在於廣海地方認獲盜犯林明便一名等情飭提

該犯赴省委員審辦茲據委員審明由司招解前來_臣等隨提犯督同司道親加研鞫緣林明便籍隸新寧據供平日販賣鮮魚度活嘉慶九年五月內被盜首張亞發擄捉過船逼脅入夥前後在洋行劫六次等語再三究詰矢口不移似無遁飾該犯情罪重大未便久稽顯戮審明後_臣等恭_摺

王命飭委按察使吳俊督標中軍副將劉惟馨將林明便一犯照江洋行劫大盜照響馬強盜例綁赴市曹斬決傳首沿海地方梟示以昭炯戒逸犯張亞發等並接濟之陸亞復飭行嚴緝務獲究辦謹

奏奉

硃批刑部速議具奏

嘉慶十年九月十二日會同廣東巡撫孫公玉庭
奏據新會縣知縣稟報有洋匪數十人乘間赴新前村
等處劫擄當卽會營督帶兵役追捕在崖門海面
見有盜匪行劫商鹽船事主逃走卽前向施放鎗
礮打傷盜匪多人落水身死各盜匪丟棄所劫鹽
船一隻商船一隻坐駕大船往大洋駛逸當經將
商鹽各船獲回仍復四處巡捕又遇前項盜船奮
勇追拏各盜換駕快船逃走拏獲落後大船一隻

擒獲盜匪洪亞就等十五名口等情當卽飭提各
犯赴省審辦據報被擄押禁之陳亞三病故據委
員廣州府知府福明將現犯審明由前任按察司
審擬招解前來經臣提犯督同審明分別辦理彙
摺具

奏欽奉

諭旨著臣核明各歸各案分晰定擬由四百里馳奏臣遵
查本案盜犯洪亞就鄭亞眼葉人受巫亞九梁十
五五名籍隸潮陽饒平新安歸善香山等縣該犯
等先後被擄及投下盜船入夥在洋隨同擄劫並

焚燒村莊十四五次或行劫并焚燒村莊四次吳
亞四張瓊僉徐明律朱信良胡孔捷區義興李亞
四鄧亞三八犯均供認被擄服役吳莊氏一口訊
認被擄在船等情屢審各犯供認前情不諱查例
載江洋行劫大盜照響馬強盜例立斬梟示又洋
盜案內被脅在船止爲盜服役並未隨行上盜如
被拏獲者杖一百徒三年各等語本案盜犯洪亞
就陳亞眼葉人受巫亞九梁十五在洋疊次擄劫
並焚燒村莊該犯等情罪重大未便稍稽顯戮審
明後臣當卽恭請

王命飭委按察使秦瀛督標中軍劉惟馨將洪亞就鄭亞
眼葉人受巫亞九梁十五五犯照江洋行劫大盜
照響馬強盜例綁赴市曹斬決仍傳首沿海地方
梟示以昭炯戒吳亞四等八犯訊止被擄在船服
役並未隨同上盜均依例杖一百徒三年至配所
各折責四十板陳亞三係被擄押禁並無接贖服
役情事已經病故應與被擄在船之吳莊氏均無
庸議吳莊氏遞回原籍保釋另船盜犯梁亞昭等
亦已拏獲另案辦理逸犯李英芳亞受哥郭大食
二飭行沿海文武嚴緝務獲究辦盜船變價充賞

所獲商鹽船隻查傳事主給領謹

奏奉

硃批刑部速議具奏

嘉慶十年九月十二日會同廣東巡撫孫公玉庭
奏據吳川縣知縣朱振聲會營督率兵役駕船緝捕見
有盜船駛近限門海口當卽督率巡役追捕適東
礮臺官兵巡至會合圍拏施放鎗礮將盜船擊沉
各犯紛紛落水逃走鎗礮擊斃數名生擒盜犯陳
老輩等三名飭委員將現犯審明由司招解前來
臣等提犯督同親鞠緣陳老輩籍隸遂溪據供嘉

慶九年正月內投下盜首狗了三管下老板周恭
孫船內入夥隨同在洋行劫三次內殺人一次又
圖劫未成一次吳聚尉黃磬二犯據供聽叫入夥
圖劫未成等語再三究詰各供如一矢口不移似
無遁飾該犯情罪重大未便稍稽顯戮審明後
等當卽恭請

王命飭委按察使吳俊督標中軍副將劉惟馨將陳老輩
一犯照江洋行劫大盜照響馬強盜例綁赴市曹
斬決傳首沿海地方梟示以昭炯戒吳聚尉黃磬
二犯訊係隨同圖劫尙未得贓亦未傷人均依強

盜未得財又未傷人從犯例杖一百流三千里至配所各折責四十板照例刺字買贓不識姓名夷人無憑提訊查起周恭孫船內食米火藥係向江坪居住之廉州府人周亞三買用其潮洲石船內食米火藥係向白龍尾居住之廉州府人余亞大買用礮械來厝周恭孫等在逃無從跟究逸盜周恭孫等並接濟之周亞二等飭行沿海文武嚴緝務獲究辦謹

奏奉

硃批刑部速議具奏

嘉慶十年九月三十日會同廣東巡撫孫公玉庭
奏爲拏獲在洋行劫勒贖濟匪盜犯審明分別辦理事

竊臣等於審訊洋盜問出雷州洋面有盜匪陳岐

沙二等在洋疊次劫擄併買物接濟當卽飭委嘉

應州戴錫綸前往會同該府營縣嚴密查拏隨據

署雷州府宗聖垣嘉應州戴錫綸代理遂溪縣知

縣段長基等稟報先後拏獲盜匪陳岐沙二等九

名等情飭提各犯解省審辦茲據委員審明由司

招解前來臣等提犯督同親鞠緣陳岐沙二黃老

燦卽黃欄賢吳老蟬林有衾四犯俱籍隸遂溪該

犯等供認或投下盜船或聽糾入夥先後在洋行
劫勒贖併接濟盜匪多次內黃老燦卽黃帆賢一
犯先經犯案擬徒在配脫逃復行爲盜伍亞車卽
伍輞發吳大布卽吳輞親吳朝注三犯據供運米
接濟盜匪多次葉猪仔客卽葉正佳一犯據供將
猪鷄各物售賣與盜匪多次陳老光卽鄧亞振一
犯據供被擄服役後逼脅在本船接贓一次再三
究詰各供如一矢口不移似無遁飾各犯情罪重
大未便稍稽顯戮審明後臣等當卽恭請

王命飭委按察使吳俊督標中軍副將劉惟馨將陳岐沙

二黃老燦卽黃幗賢吳老螺林有衾四犯照江洋
行劫大盜照響馬強盜例綁赴市曹斬決傳首沿
海地方梟示以昭炯戒伍亞車卽伍幗發吳大布
卽吳幗衾吳朝注三犯屢赴盜船賣米接濟均合
依奸徒將米穀接濟奸匪例擬絞決俱照例先行
刺字葉猪仔客卽葉正佳一犯僅將小猪鷄鴨烟
蔗運至盜船售賣與米穀麥襍糧不同惟通盜漁
利應比照奸徒將米穀豆麥襍糧偷運外洋接濟
奸匪擬絞立決例量減一等杖一百流三千里改
發黑龍江等處給披甲人爲奴陳老光卽鄧亞振

一犯被擄服役後逼脅在本船接贓一次合依洋盜案內接贓一次例發黑龍江給打牲索倫達呼爾爲奴均照例刺字黃老燦卽黃綱賢犯案擬徒在配脫逃配所看役並非知情故縱均毋庸議船隻礮械火藥據供不知來歷且盜首烏石二等在逃無憑根究各犯所得贓銀照追入官充用逸犯吳文通等及盜首烏石二等飭行沿海營縣及巡洋舟師嚴緝務獲究辦謹

奏奉

硃批刑部速議具奏

嘉慶十年九月三十日會同廣東巡撫孫公玉庭
奏據電白縣知縣盛植才會營督率兵役村民在於蓮
頭海旁緝獲洋匪梅遂初一名等情當卽飭提赴
省委員審辦茲據委員審明由司招解前來臣等
提犯督同親鞫緣梅遂初籍隸新寧據供嘉慶十
年五月內投下盜首王四哥船內入夥隨同在洋
劫擄一次圖劫未成一次等情再三究詰矢口不
移似無遁飾該犯情罪重大未便久稽顯戮審明
後臣等當卽恭請

王命飭委按察使吳俊督標中軍副將劉惟馨將梅遂初

一犯照江洋行劫大盜照響馬強盜例綁赴市曹
斬決傳首沿海地方梟示以照炯戒該犯訊無另
犯別案亦無同居親屬知情分贓逸犯王四哥等
飭行沿海營縣嚴拏務獲究辦謹

奏奉

硃批刑部知道

嘉慶十年九月三十日

奏爲舟師打仗獲賊就近訊明分別正法定擬事竊

臣

因捕務喫緊親駕米艇撫巡士卒申明賞罰使各
將弁兵丁齊心協力上緊勦捕不致貪逸避賊行

至東莞地方探聞伶仃洋外現有匪船遊奕卽飛飭順德協副將李光顯等師船卽速擒剿嗣抵虎門卽據該副將稟報卽日帶同已革守備羅耀紀等在香山縣屬之白鶴洲望見浪白各洋面有大小船二十餘隻卽率兵船分投星往追捕盜匪正在劫奪鹽船見師船追到當卽星散獲回被劫重載大鹽舢船一隻復追至大虎洋面賊船漸近兵船兜圍放礮轟擊賊亦轉遶開礮拒敵各弁兵奮勇連環攻打鎗礮齊發傷斃賊匪甚多賊勢漸不能支該守備羅耀紀駕坐外委何英一船乘勢當

先橫截撞翻撈緝盜船一隻又擊沉撈緝拖風盜
船三隻而該革備帶往投首入伍之羅成振吳海
進陳養興隊目譚均等尤爲出力奮勇爭先下海
皂水撈獲盜首陳亞和等多名署千總曹輝清等
船亦自旁追攏拏獲齊桅盜船一隻快艇一隻匪
衆紛紛落水各駕三板擒捕因風大月黑不能指
拏餘賊俱隨波捲沒將船隻駛回點驗獲賊三十
名口當卽報解臣船上隨飭委署佛山同知易萬
里候補同知懷沅東莞縣知縣陶必榕候補縣張
思聰等逐加研鞫錄取確供申送前來臣卽督同

運司蔡共武肇羅道朱爾漢親行提訊緣陳亞和
周亞包張亞三麥亞鐘陳尙科陶亞三陳亞六陳
亞妹倫亞堂九犯籍隸新安歸善新寧東莞順德
番禺各縣不等據陳亞和供稱因有哥子陳亞章
被賊擄去本年七月二十六日到香山四船上探
聽哥子不見卽被香山四留住派管三板船一隻
併撥舵工頭目陳亞六們共十四人本年八月內
記不起日子隨同香山四會齊亞保仔共三幫船
有二十餘隻駛至番禺新造墟打劫各舖該犯持
刀上岸劫得穀豬三隻九月二十一日又跟隨香

山四駛至澳門西白簾洋面行劫鹽艚一隻押令
鍾金祖在本船接遞贓物併擄捉鹽船上朱亞元
卿亞恩過船押禁十月初四日在香山不識名洋
面打劫山貨船一隻擄捉陳亞尾杜亞四二人過
船逼脅入夥不從押禁艙底初七日同香山四各
幫二十餘隻在香山洋面遊奕被師船撞遇各船
逃散六船落後被礮打傷各船上夥盜各自落水
不知死活該犯被獲等語又據周亞包供認隨同
打劫新造墟各舖又打劫黃浦潭洲俱持刀上岸
張亞三供認在新造墟潭洲黃浦隨同打劫麥亞

鍾供認行劫四次陳尙科供認劫擄五次陶亞三
供認打劫鹽艚船一次陳亞六供認行劫三次陳
亞抹供認行劫四次倫亞堂供認隨同打劫三次
又梁潮昇黃亞才鍾亞金謝亞定盧亞季侯亞四
黃亞進七犯俱供認在船接賊一次謝景賢何亞
帶杜振升李宗等四犯俱供認被脅服役並無上
盜接贓情事朱亞元卿亞恩及婦女幼孩杜王氏
杜阿執等十名口均係被擄押禁艙底並無從盜
服役等情再三究詰矢口不移案無遁飾各犯情
罪重大未便久稽顯戮審明後臣等當卽恭請

王命飭委肇羅道朱爾漢署右翼鎮唐光茂將陳亞和周
亞包張亞三麥亞鐘陳尙科陶亞三陳亞六陳亞
妹倫亞堂九犯照江洋行劫大盜照響馬強盜例
綁赴市曹斬決傳首犯事地方梟示以昭炯戒梁
潮昇黃亞才鐘金祖謝亞定盧亞季侯亞四黃亞
進七犯接贓一次應發往黑龍江給打牲索倫達
呼爾爲奴俱照例刺字謝景賢何亞帶杜振升李
委宗四犯被擄服役均照例杖一百徒三年朱亞
元卿亞恩陳亞尾杜亞四被擄押禁應與婦女杜
王氏杜亞執杜亞蒂及幼孩杜北勝杜亞蚊郭亞

陳亞石吳勝底等各情形業經彙摺具

奏一面飭提該礮臺弁兵及拏獲各盜犯解省委員審
辦據報兵丁莫迪才黃國禎吳得陞脫逃駱得勝
患病未到案犯陳亞石鄭亞六游遇培李元陳上
明五名取供後先後病故茲據委員廣州府知府
福明等將現犯審明由按察使吳俊布政使廣厚
審擬招解前來臣等隨提集弁兵盜犯督同司道
親加研鞫緣歸善縣屬盤沿港地方向建東西礮
臺兩座距縣城一百九十餘里東礮臺安設大小
礮五位并火藥烏鎗刀械派外委劉俊達帶領隊

目陳鳳陞朱茂亮及兵丁廖元光等共三十名防守西礮臺安設大小礮五位并火藥鳥鎗刀械派行營外委汪彪帶領隊目楊有得葉廷貴及兵丁邱日確等共三十名防守因陸豐縣民吳勝底羅火生於嘉慶九年八月間先後投下素識未獲之老板謝景風船內入夥該船有盜夥三十餘人并刀械等物吳勝底等只認識老板謝景風盜夥周亞六孫亞羅王燕洪亞槐陳俊秀謝張文林易棕亞見亞端亞添老謝十二人餘俱不識嗣有現獲之莊亞房洪亞尾陳亞笑及現獲病故之陳亞

文陸續捉下老板謝景鳳船內入夥又現獲病故
之陳亞石籍隸海豐在新安縣長洲洋面捕魚被
盜首黃正嵩搗捉下船派過管下頭目亞爲快馬
船內入夥該船有盜夥三十餘人并刀械等物陳
亞石只認識頭目亞爲盜夥金亞富餘俱不識又
陸豐縣民馬亞建先於嘉慶五年間以馬山名字
充當甲子營兵嗣因悞操草伍於嘉慶十年正月
十四日投下素識之盜首黃正嵩管下頭目李立
春船內入夥該船有盜夥二十餘人并刀械等物
馬亞建止認識頭目李立春盜夥李會錦元合亞

心亞複全木六人餘俱不識嘉慶十年六月初一日謝景鳳亞爲李立春各船同盜首黃正嵩等船隻駛至歸善縣大星洋面寄旋黃正嵩因伊船缺少火藥稔知盤沿港東西礮臺貯有火藥礮械起意商同前往劫奪謝景鳳等允從初二日早黃正嵩謝景鳳亞爲李立春與吳勝底羅火生陳亞石馬亞建等共一百餘人攜帶刀械坐駕三板脚艇駛至盤沿港僻處登岸從山上繞近東礮臺時西礮臺行營外委汪彪前赴該處與外委劉俊達商議捕務兵丁練朝陞因孀母身故黃德昌患病均

先告假回家謝朝高遞送公文駱文耀差資家信
陳上明劉耀明赴縣請領餉米曾遇龍差往查緝
賊匪該外委劉俊達查見該匪等率衆上岸卽差
兵丁黎鎮綱楊耀赴縣并惠州協請救一面與行
營外委汪彪帶同隊目陳鳳陞朱茂亮兵丁黎朝
鳳陳門富廖元光等施放鎗礮擊斃不識姓名盜
匪三人賊人恃衆搶上礮臺該弁劉俊達等與黎
朝鳳等向捕盜首黃正嵩拒傷黎朝鳳陳開富身
死劉俊達汪彪畏怯先行跑避陳鳳陞等亦隨後
奔逃均失跌受傷吳勝底羅火生等分搶礮位刀

械火藥等物與各盜轉回艇內復向西礮臺劫掠時兵丁黃進安余得亮張朝發張勝龍梁文陞吳高何得華羅上彩莊得高九名因甫奉撥防收拾行李尙未到臺王有亮因兄故賂得勝患病俱先告假回家該行營外委汪彪已赴東礮臺商議捕務兵丁莫迪才黃國楨吳得陞見賊衆驟至不能抵禦先下臺跑走隊首楊有得葉廷貴兵丁邱日雄等亦隨後奔避均失跌受傷吳勝底羅火生等分搶礮位刀械火藥等物轉回艇內運至盜首黃正嵩大船收貯迨行營外委汪彪趕回西礮臺業

已失事追捕不及比黎鎮綱楊耀明赴營縣具報
歸善縣知縣康傑卽會營督率平政司巡檢黃兆
綸帶領兵役馳赴追捕因各盜船已分投駕逃止
頭目亞爲一船是日下午駛至鹽州洋面行劫鹽
船經該營縣兵役駕船追至圍拏殺傷盜匪三四
人落水未知生死夥盜陳亞石驚慌梟水逃避被
兵役拏獲頭目李立春一船於六月初三日駛至
海豐縣甲子港洋面馬亞建隨同李立春行劫不
識姓名事主鹽船二隻隨後李立春令馬亞建上
岸探聽官兵消息被陸豐縣役協同營兵拏獲老

板謝景鳳一船於六月十八日駛至歸善縣小漠洋面適歸善縣康傑會營追至圍拏吳勝底等驚慌梟水逃走被兵役拏獲此吳勝底等隨同未獲之謝景鳳等行劫礮臺被獲之原委也并究出吳勝底羅火生洪亞尾及病故之鄭亞六先經隨同謝景鳳在洋陸續擄捉現獲之洪亞生馮南英周亞祐陳振懷李亞魚黃添生黃亞添過船逼脅入夥不從押令服役該犯吳勝底等復又隨同謝景鳳在洋行劫多次謝景鳳逼令洪亞生馮南英周亞祐陳振懷在本船接遞贓物一次馬亞建先經

在洋行劫二次莊亞房陳亞笑投下盜船入夥先
後隨同謝景鳳在洋劫擄多次並無隨同打劫礮
臺等情嚴詰弁兵劉俊達等委因賊匪衆多抵禦
不住一時畏怯跑避致被劫去礮械等項並無通
盜送給情事盜犯吳勝底羅火生洪亞尾馬亞建
等實止隨同劫擄并行劫礮臺並未拒傷官兵此
外別無不法情事嚴加究詰衆供如一矢口不移
似無遁飾查例載江洋行劫大盜照響馬強盜例
立斬梟示又洋盜案內被脅接贓一次發黑龍江
給打牲索倫達呼爾爲奴又被脅服役之犯如被

拏獲者杖一百徒三年又律載官軍臨陣先退者
斬監候各等語本案吳勝底羅火生洪亞尾馬亞
建在洋疊次劫擄并隨同行劫礮臺莊亞房陳亞
笑在洋擄劫多次均屬不法吳勝底羅火生洪亞
尾馬亞建莊亞房陳亞笑均合依江洋行劫大盜
照響馬強盜例立斬梟示該犯等情罪重大未便
稍稽顯戮審明後臣等當卽恭請

王命飭委按察使吳俊督標中軍副將劉惟馨將吳勝底
羅火生洪亞尾馬亞建莊亞房陳亞笑六犯綁赴
市曹斬決並將病故之鄭亞六陳亞石戮屍一併

傳首犯事地方梟示以昭炯戒洪亞生馮南英周亞祐陳振懷被擄服役後逼脅在本船接賊一次並無隨同行劫情事均合依洋盜案內被脅接賊一次發黑龍江打牲索倫達呼爾爲奴例發黑龍江給打牲索倫達呼爾爲奴照例刺字李亞魚黃添生黃亞添訊止爲盜服役並無隨同上盜接賊情事均合依被脅服役之犯如被拏獲杖一百徒三年例杖一百徒三年至配所折責四十板外委劉俊達防守盤沿港東礮臺當賊匪猝入行劫並不督率兵丁竭力抵禦輒心懷畏怯先行跑避致

各兵隨同奔逃被賊劫去礮械各項行營外委汪彪係撥防西礮臺因赴東礮臺商議捕務見賊劫掠並不協力抗拒輒與劉俊達一同先逃厥罪惟均應照臨陣先退本律科斷劉俊達除私役兵丁賫送家信輕罪不議外應與汪彪均革去外委照官軍臨陣先退者斬監候律俱擬斬監候秋後處決照例先行刺字兵丁陳鳳陞等三十五名雖無首先退避情事惟隨同外委劉俊達等奔逃實屬恇怯應請革除名糧於劉俊達等斬罪上減一等杖一百流三千里均改發伊犁等處酌撥各城充

當苦差游遇培李元業已病故應毋庸議陳鳳陞
紀得海張鳳彩吳春黃等供稱親老丁單惟情罪
較重毋庸取結留養兵丁練朝陞黃得昌王有亮
駱得勝告假在先謝朝高遞送公文駱文耀差賚
家信陳上明劉耀明赴縣請領餉米曾遇龍往緝
賊匪黎鎮綱楊耀明赴營縣具報黃進安余得亮
張朝發張勝龍梁文陞吳高何得華羅上彩莊得
高甫奉撥防收拾行李尙未到臺均毋庸議發回
歸伍陳上明業已在寓病故應毋庸議駱得勝患
病未到並免提訊盜犯吳勝底等父兄飭縣查拘

照例發落各犯訊無另有犯案其在洋行劫原籍
牌頭甲保無從查察謝景鳳等盜船礮械各犯委
不知其來歷亦未經由營汛口岸各犯弁兵實無
知情故縱收受陋規情弊均毋庸議兵丁黎朝鳳
陳開富均因捕賊受傷身死應請照例賞卹相應
聲明聽候部議被劫礮位軍械飭令歸善縣估明
價值著落該管營縣賠補各兵遺缺飭卽充補以
資防禦再查礮臺被搶所有疎防兼統專轄文武
各員弁均應查明分別叅辦此次盤沿失事一案
知縣巡檢本不同城例止開叅聽候部議唯礮臺

係陸路惠州管轄與水師營分礮臺濱臨外海者
不同且係東西兩處礮臺被劫現屆洋匪充斥全
在該管各文武齊心協力武則督率弁兵文則團
練役勇上緊巡防堵緝不予以隙自不致有意外
之虞屢經嚴加檄飭乃該管惠州協副將馬兆瑞
歸善縣知縣康傑諸事因循平政司巡檢黃兆綸
係分防附近專管之員平時均毫無防範實屬有
忝職守若不從嚴叅辦無以示儆於將來應請

旨將惠州協副將馬兆瑞歸善縣知縣康傑平政司巡檢
黃兆綸照溺職例一併革職留緝以爲玩視海防

者戒至本案疎防兼統文武各職名仍俟查明照
例分別辦理西礮臺兵丁莫迪才黃國楨吳得陞
見賊赴臺行劫輒首先跑走與臨陣先退無異均
應照例擬斬俟緝獲究辦逸盜黃正嵩謝景鳳等
及賣米之謝亞九等飭行沿海營縣及巡洋舟師
嚴緝務獲究辦再盜犯陳亞六陳亞石二名遣犯
游遇培李元二名均係帶病進監病故管獄職名
例毋議處請免開報謹

奏

嘉慶十年十月初二日

奏爲續報洋盜投誠事竊照沿海盜匪經臣等實力督率各文武上緊巡防嚴拏勾通接濟一切米糧軍火棕鐵油蔴之物全行查禁陸續稟獲之犯又有數百餘名察其情形實漸窮蹙臣復又多設方法用謀用間偵之賊匪近日接濟旣少僅能食粥影黨日亂不甚敢於傍岸一經傍岸脅從者大半跳水走散故近來各口岸逃回被擄之人甚多其頭目率將器械收起至打劫時方給各人持用無事時將衆人關禁艙底恐其生心內變是以彼此懷疑自相解散大幫之船與殺賊投誠者遂多接踵

而來前此先後據報投首共一千三百十二名口

業經臣會同撫臣將各緣由節次恭摺具

奏在案茲續據順德縣沈權衡紫泥司巡檢章予之各稟稱前次投首已經奏報之馮亞連帶同殺賊逃回之何亞帶黃亞齊二名赴縣據何亞帶供稱向係鹽船水手與馮亞連同時被盜擄捉過船逼脅掃艙煮飯因不甘從盜與馮亞連們密商乘間殺死賊首蘇亞惠又有同船被擄之黃亞齊們也幫同將賊黨朱陳盈卽陳老三殺死馮亞連又殺死賊目陳亞美又有被禁服役之關亞貴殺死大賊

首大礮複分路逃回因聞馮亞連已經得所免其
帶來投首等語又據運商職員鄧時宜稟稱有總
頭目陳自新卽陳亞揚並陳協瑞投稱伊等久有
投誠之意不敢行劫船中日食不敷先將散夥一
百十餘人近家可歸者沿途放令回籍今陳亞揚
帶同妻子並頭目七名副頭目九名散夥二十名
大小船二隻陳協瑞帶同頭目四名散夥三名大
船一隻繳送大小礮五門并刀械多件懇爲轉稟
等語又據運商鄧時宜稟報探得總盜首烏石二
現發快船六七隻在歸善新安交界之鹿角洋總

路阻拏各處投誠船隻經該商僱備索罟漁船十三號並鄉勇兵役等馳赴防範旋據伊弟鄧從龍來報該洋面止有盜船五隻並不敢拒敵據稱實係烏石二之頭目張奇勝等六名散夥一百零二名船五號烏石二令在總路提拏投誠船隻該頭目等久有投誠之心實不願從賊詎請賊令來此乘便投首經該商察看屬實當即將五船卸舵礮械搬繳查無隱匿照舊捐給口糧候示又據運商鄧時宜稟稱有洋盜四匪不獲等五名帶船五號散夥一百一十五名駛至洗馬湖轉求先來之

張奇勝代請投誠各等語又據鵝埠領司巡檢徐維珩稟報有匪船兩號揚帆直駛內港當卽會同把總吳連高施放火礮堵禦該匪船人等高聲叫喊稱係殺賊歸順隨有五人梟水登岸並持首級三顆前來訊據陳城利林榮耀林士宗林亞華林亞悅等同供伊等兩船除殺死八人外現在船內尙有四十人因黃正嵩大幫匪船停泊金鑲石洋面特派先鋒陳友發一船前來汕尾鮎門把港打單我們早欲歸順陳友發一船放殺死來投並繳礮械等六十四件又據墩白場鹽大使德英稟正

在辦理前經奏報之韓斗鳳沈世傳各起間又有聞風來投之張城才等四名帶船四隻夥盜一百零九名經線人陳希舜等據情轉稟又據平政司巡檢黃兆綸稟有匪船一隻在小漠港外停泊隨即往捕該船匪並不抗拒咸稱殺死賊首正要登岸投首該巡檢上船搜查船內有吳亞興等男婦十一名口並鐵礮二門蒲包內人頭一顆船尾屍身一具又有方亞好三名先已上岸被營盤獲訊據吳亞興等供稱先後被盜首陳亞生等擄捉過船因不甘從盜先將盜械什物丟棄海中商同乘

問殺賊投首先被陳亞生知覺砍殺一人落海大
家下手將陳亞生及夥匪細華亞發亞意四人一
齊殺死細華們三人屍首拋海祇留陳亞生屍身
在船作據並用蒲包裝貯首級正欲攜取上岸投
首等語據左翼鎮外委翟超漢押送投首洋匪馮
悅華男婦六十一名口併船隻礮械到省當卽飭
委南韶道朱棟等分別安插再訊據馮悅華等稱
被盜首劉唐伯卽鄭老童的快艇頭目老稍二擄
捉過船逼脅入夥隨同在洋攔阻客商打單贖水
等事實係無奈從賊又畏罪不敢回來近日水米

火藥缺乏又聞各憲出示許以投首免罪就與陳亞幾們熟商因老稍二不允與他打仗陳亞幾李亞有蔡亞帶三人被老稍二礮火打傷老稍二船上也被打傷數人連夜乘風馳赴虎門礮臺投首等語又據拏獲接濟匪犯因悔罪情願作線招賊之陳善操稟有劉唐伯幫內大頭目陳亞九帶領流繒拖風齊桅船三隻首夥男婦共九十名口大小礮十七位併刀械等項悔罪投誠並據查明內有安南人阮亞三阮亞四二名陳亞九卽係劉唐伯之義子張亞九等語又據新寧縣湛川司巡檢

杜華林稟報稱東北口外洋有盜船一隻寄碇先
有小船一隻入港投稱陳亞相黃亞丁林亞慶俱
係在船頭目因盜首鄭亞龍不肯隨同投誠陳亞
相起意商同衆人將鄭亞龍及舊頭目亞六乘睡
殺死又將舵工亞已舊頭目亞貴併自行投落不
識姓名梗議之人俱推落海帶領男婦三十三名
口駕船來澳投誠等語又據潮州府知府朱爾賡
額署澄海縣知縣謝景淳各稟稱有匪船黃亞四
卽黃茂一幫停泊萊蕪懸書竹竿乞准投首卽令
頭目陳開烈等四人上岸叩頭其意甚真又塗弼

洋面有盜首黃亞九卽黃德泰一幫又鳳巖洋面有盜首關兆金一幫又大萊蕪洋面有巨盜首許雲相及王騰魁楊勝廣三幫在彼觀望據黃茂稟稱各幫俱有投誠之意無線可引卽據

奏留之知縣楊桂蔭又委員胡以宣章鏞宗德懋王金等均願親赴各幫曉諭遂會同營員帶領黃茂連次往返示以誠信各幫俱俯首願投內許雲相三幫更屬船大人勇經各員屢次開導均極傾心輸誠黃茂一幫計一號黃德泰幫船四號共繳送大小礮一百位火藥五百餘觔器械八百八十三件

投到大小男婦四百八十九名口關兆金一幫船
二號大小男婦八十九名口繳呈大小礮十九位
火藥一百二十觔器械二百十九件許雲相王驤
魁楊盛廣三幫船十號大小男婦六百六十九名
口共繳呈大小礮一百二十七位火藥五百十觔
器械七百八十九件以上投首各起共一千八百
六十三名口查所供被殺之大礮複實係著名首
惡竟得殲除陳亞生亦卽前次投誠林亞發之同
幫賊目陳友發係黃正嵩之先鋒頭目始終怙惡
以致被殺張奇勝係烏石二之大頭目烏石二令

其阻拏私逃船隻今其率衆前來且有蓄志已久
出於無奈之言其情亦有可原黃茂卽黃亞四許
雲相均係歷久著名大幫強盜而潮州府所辦六
幫計船二十七號共一千二百七十餘名口數更
不少臣節據各屬稟報卽飭委明幹大員督同該
地方文武員弁照前妥協辦理安插具報其爲首
及副頭目人等情願入伍者飭提省逐一察驗諭
以

皇上網開一面之恩無不感激叩頭僉稱願効死力以贖
前愆所有此次投首人內可否仍懇

皇上格外

天恩將黃茂吳亞興陳城利張奇勝許雲相陳亞松賞給
千總頂戴林榮耀林志宗林亞華林亞悅何亞帶
黃亞齊陳自新陳協瑞張城才馮悅華陳阿九黃
德泰關兆金王騰魁陳友發戴仕發黃亞泰陳開
烈賞給把總外委頂戴之處臣未敢擅便候

旨施恩再查投首之人前三次奏報併此次續報統計三
千一百七十餘名口仍照前議章程辦理但安插
之事期於核實不得不嚴立處分俾各地方官咸
知警惕嚴加管束應請以後入伍歸農充役各項

交各營各縣按月查點彙冊報核如有不善管束
失於查察以致逃去者請

旨飭部嚴定處分以示法守至現在尙有續來投首者窮
而歸命於事理斷不能揮之使去爲盜然事機愈
順愈當加倍慎重將來爲數漸多則安插之地亦
有人滿之虞入伍者不能暫增糧額無業者又無
從給懇開田而內中亦有爲盜多年曾經殺害居
民有指名相仇之人此時既不可加之誅戮又不
可聽其聚處以致別滋事端容臣悉心籌畫必思
計出萬全再行妥擬章程奏請

訓示遵行再此次辦理投首盜匪爲數過多撫臣孫玉庭
恐將來善後事宜難於辦理意欲示立限期逾期
不准收納與臣意見不同是以未經會銜但事關
重大臣不敢不先行馳奏所以此次出力各文武
員弁亦未敢一人擅自保奏陞賞聽候

諭旨應否准保以示鼓勵之處隨後查明再行補奏請
奏

嘉慶十年十月初二日

奏爲辦理洋盜剿撫事宜恭摺奏

聞請

旨事竊查粵東洋匪滋事十餘年來沿海數千里深受其害自乾隆五十八年以後年年捕盜費日以廣盜日以增臣到粵數月確查情形深維大計恪遵

皇上指示機宜遏絕勾通嚴禁接濟激勵官弁咸發士民正氣業已奮揚近又將廣州灣賊巢剿淨賊衆亦極寒心其米糧等物間有透漏賊黨既多亦非些微可以敷食情形十分窮蹙臣又預飭礮臺塘汛嚴密防堵間有撲岸之賊亦均未能得利戰守之資頗爲嚴備臣仍復不遺餘力兼用熟悉盜踪與新舊投降之人廣爲間諜使之自相疑貳自相殘

殺所以投首者紛紛踵至查嘉慶五年原有投首之事因辦理不善勒示限期踰期不來卽不收納當卽欽奉

諭旨以爲以立限爲辭總不成話倘逾限不來不准其投首盡置之於法乎抑概行拒絕聽其赴洋爲盜乎實無此辦法嗣後仍當隨時收留妥爲安置無得拘定限期致多窒礙欽此

臣

查出原案敬謹跪讀頓開塞滯辦理

益可遵行業經兩次將投首之案與撫

臣

孫玉庭

聯銜具奏詎撫

臣

忽別存意見先欲立限受降

臣

未能允從繼又以辦理多有未協不肯會銜另自

陳奏查盜匪既經投誠誠如

聖諭未便予以斷誅亦未可拒而不納復使去而爲盜之
理卽如數十萬教匪蒙

皇上

睿謨廣運不數年而悉歸蕩平何嘗不勦撫兼施得以成
功迅速孫玉庭在粵前後已半年有餘往年盜匪
浸熾之時於勦守之事未聞一有布置且洋盜情
形併未知悉亦未經專摺奏明

聖主今又以投誠爲非則勦撫二者俱無所施不知更有
何策可以盡善若臣亦扶同隱諱趨避斷斷不敢

且查現在大幫盜首鄭一島石二東海伯劉唐伯黃正嵩郭婆帶李湘青總兵寶鄭維豐與已投誠之林亞發許雲相黃茂等卽當時限外未收之盜至今貽害無窮

臣受

恩深重自應竭盡血誠任勞任過斷不敢因循畏難致染外官故習但自分才識短淺不敢自以爲是兩次至撫署面商意見未能盡一所有投首各稿又令司道等往返五次請撫

臣

畫押執意不肯

臣

以關係重大斷非一人私意可臆斷之事又劄會在省司道公同核議亦皆不以立限爲是以撫爲非今

既已兩議不得不單銜具奏臣爲公事起見並非
別有私意合併聲明謹將往復辯議另單恭呈

御覽謹

奏

一原議海中盜匪不下數萬若盡行招撫非數十
萬金不可後難爲繼而捕費更用何項此經費
甚難也查廣東捕盜經費近年以來借防堵爲
名每歲公私需用不下數十萬兩勦撫兩不得
力總未辦去一股賊匪此項虛糜實無底止臣
前議每投首一名請准開銷安插銀十兩若果

用銀數十萬卽可散劇賊數萬則此項究歸核實較之空談剿守徒費無益者豈不懸殊且全海之賊旣不能盡剿亦不能全撫正宜乘此機會散賊黨羽其勢旣孤則剿捕更得迅速完事是辦撫之費卽辦剿之資前經屢奉

諭旨令

臣

不得愛惜小費致悞大事

臣

自接辦以來所辦

各事除兵餉貼防之費開支正欸一切緝捕經費俱係

臣

籌欸辦理仍擬將來籌辦備用

一原議投首所殺之賊是否確係盜犯無從查其底裏是殺賊投首未可盡信也查投誠之人必

須將船隻礮械盡行繳官卽使賊目首級無從
查考而所繳之船有出洋大開波大紅單大拖
風之類其礮位有二三千觔五六千觔不等現
俱交官註冊不能虛假且船隻礮械非可猝辦
必積之十餘年而後資以爲用今旣繳官卽令
再有反覆亦須再積數年目前已可無患至云
所獻賊目首級難於盡信然爲大局起見止可
權爲包容使虛聲所播賊黨自相猜疑於辦賊
實有裨益且旣已悔罪投誠勢不可再加之審
訊設將現在投首之人竟審辦一二人則全局

盡散不但聞風褻足卽業已投首之衆人人自危殊非息事安人之道

一原議盜犯投首之後不聞劫掠案由卽得脫身免罪而該地方文武各官無從銷案徒受處分是循名責實礙難分理也查地方官尋常盜案果能拏獲首夥自可寬其處分其平日廢弛失於防守致村莊蹂躪殘害生命不加重罪已屬皇上格外之恩臣等身爲大員費盡苦心辦至賊人窮蹙來歸之候豈又轉爲伊等計及開脫處分且賊人窮而籲投亦萬無分別某人係某案之盜文

武處分未清不敢收納之理如必欲訊明則滿
海之賊人人有案必待地方官一一查拏則永
無辦盡之期譬之接仗之時勢不能辨明某某
曾到某處然後施放鎗礮若就撫之時因難銷
處分而不受是打仗之時亦將因有礙開復而
不殺勦撫大計均以地方官之處分格而不辦
名曰守法而跡涉瞻徇況在事文武如果出色
出力

聖恩尙准破格保奏倘得海疆肅清

皇上亦必將已往之愆格外寬免臨時仍懇

准請

旨

一原議賊匪非真悔罪特因貪利而來官吏意在邀功不惜重金爲市是偏重招撫致生謗議也查從前辦理招撫之時知府大員俱至賊船彼此拜往至議船值若干礮值若干外賞三十四十金不等然一奏之後除賊首數十交營管束餘人槩置不議聽其自散今則實因查拏勾通接濟旣嚴窮而來投大非往日之許賞勸降可比粵省官場民俗好爲造作謠言然虛實自在

此等大事不能因浮議遂爲中止至其中有殺賊來投者有自至礮臺兵船報降者此又係何人出貲購到若官吏邀功之說竊思地方遇有大事但患臣等賞罰不公不能提撥在事人之精神倘人人各懷立功之志爭先恐後是卽人心轉機較之近年上下疲玩縱賊勾連因循貽悞者又當何如

聖明自可洞鑒臣亦無庸多辯

一原議此等盜犯無恒產恒業回籍之後衣食無資故智復萌因之勾結匪類是岸上之盜日益

滋多也查海盜因近年官吏積玩因循水陸合
成一氣是向來陸路之盜本已不少現在陸路
嚴緊設竟挺而走險或如從前之勾通安南或
在海中竊據島嶼爲患益深辦理更爲費手今
置之岸上卽使野心不改別生事端尙有踪跡
可尋得以制其生命不至如海捕之徒費無功
臣亦籌及將來人數衆多或於廣西間曠地方
安插給墾俾其去海旣遠亦得衣食有資惟事
關重大必須與通省曉事官員悉心妥議然後
可以條奏請

旨所有現在安插之人只有嚴行責成各州縣協營按月查點冊報嚴定處分則責成既專防範自密矣一原議投誠賊目加之頂戴居然高出齊民之上等語查率衆來歸爲功從前辦理例有明文卽如現在就撫之林亞發黃茂許雲相均係著名大盜所率投誠之數千人如須打仗殺盡雖兵力可靠而糜費已恐不少且如不許以投誠絕其自新之路則窮而覓食五千里之口岸焉能保其必無疎失一經登岸焚劫搶殺民命何堪今不費一兵不糜一餉不過以千把之頂戴權

示羈縻賞爲首之數人而餘黨悉皆安貼兩相比較又孰得而孰失也且入手辦理稍可從優現仍督兵打仗加力上緊嚴防口岸此後賊幫日形窮蹙來者更多又不妨漸從輕減以示等威必不至泛濫無止

容安謹按以上三奏以先公解任蒙

諭交吳公熊光查訊

上諭恭載於後

嘉慶十年十月二十二日

奏爲續收投誠各起妥爲安插事竊照洋盜投首各起

前經節次具

奏共三千一百七十五名口分別辦理在案茲臣自省

督帶新配各兵船先出虎門大洋西入礁門潭洲

一帶洋面順道查閱營伍礮臺卽嚴諭水陸將弁

兵丁務須協力同心奮勉殺賊以圖立功受賞况

乘此投首人等絡繹來歸之候非痛加勦滅不足

以堅其悔罪之心士氣更爲百倍振作而各屬派

委巡防之文員亦覺踴躍從事旋據投効候選未

入流戴均恩稟稱在惠州一帶購線緝拏洋匪行

抵海豐縣屬之汕尾港口有周啟道蔡亞獅二人

投稱蓄心投首屢勸盜首亞思夥盜亞雙同來伊等不依因將亞恩殺斃亞雙跳水身死今割取亞思首級爲據率夥衆共二十一名并繳船一隻鐵礮四門器械各件懇請轉稟等語又據陽江縣海陵司巡檢宋玉龍春江協外委陳亮宗等稟稱有大盜首總兵寶之快馬中拖漁船一隻頭目葉亞伍等三十七名口到馬尾山澳內投首並收到鐵礮七門火藥八觔挑刀紮鎗六十二件短刀十五柄烏鎗三股又各一桿當同礮臺外委陳亮宗義勇職員馮國瑞陳鴻謨等批解核辦等語又據粵

閩南澳同知馬滌稟稱有線人右營記名外委陳
永式收到賊首林漢忠帶領大小盜船二隻水手
舵工共三十五人大鐵礮二門子母礮一門子礮
三門百子礮四門火藥二罐鎗刀藤牌三十四件
等情愿歸化不敢爲盜現在辦理等語又據署佛
山同知候補通判易萬里東莞縣知縣陶必格候
補巡檢唐欽仁等稟稱有頭目李潤複等殺死盜
首黃亞四割取首級帶同夥黨何成位等男婦二
百四十一名口及船隻礮械畏罪投首據供被賊
首黃亞四擄捉過船逼脅爲盜自知身犯死罪久

已有心投首因孤掌難鳴常與同夥蘇亞義葉奉
春等商勸黃亞四投首無奈伊聽信心腹黃自貴
李亞四何亞七三人言語執迷不悟適泊大鵬海
邊遇另幫頭目何陳位陳亞發等船亦同在彼寄
棹有熟識之張亞白過船告知伊已投首免罪入
伍蒙易分府馬分府何庫廳各官諭令出海立功
如有不甘從賊之人勸令趁早投首若有梗議阻
撓者殺死獻功更爲義勇其時何成位陳亞發一
同聽聞無不踴躍首肯惟黃亞四等四人始終執
迷是夜李潤複等乘黃亞四睡熟將伊砍倒蘇亞

義等上前幫助黃自貴等驚起將蘇亞義砍傷手
臂葉奉春砍傷頭顱蘇亞義之妻李氏上前救護
亦被砍傷面門賴何成位陳亞發等過船大衆將
黃自貴三人砍落海中割取黃亞四首級合夥前
來繳呈拖風流繪船大小七號大小鐵礮三十五
門鉛子火藥烏鎗刀械多件等語以上投首各起
共三百二十九名口此內殺賊獻功者二起餘皆
率衆輸誠懇求免罪

臣

當將各該犯等好爲問取

供詞錄呈

聖鑒所有現在賊匪窮蹙情形自可仰邀

洞照無塵

聖慈再奉到

諭旨著傳集各投首人等諭以爾等皆屢經犯法罪在不赦今准投首併令安插得所當從此勉爲良善若再稍有滋事不肯安分必當加倍治罪如能幫助官兵出力剿捕著有勞績卽當奏明陞獎等因欽此欽遵臣跪讀之下仰見我

皇上仁智如天使民遷善遠罪之至意如此剴切曉諭使伊等知感知懼必可收以賊攻賊之效惟恐該匪等土語聲牙臨時宣說難於通曉當將

諭旨內飭諭一段敬爲摘出詳加申說列作牌文卽將其人之年貌籍貫分別入伍歸農開列於後除婦女幼孩外各給一紙令其收執俾觸目警心勿萌故智卽互相傳觀亦可使怙惡之徒忽發猛省此事一經

睿謨指示洞中機宜臣等辦理益得主腦覺肅清海氛真非難事矣至安插之法誠如

聖諭宜散而不宜聚大約頭目多願入伍散夥多願歸農蓋頭目多係老盜久在洋面必已擁有厚貨既恐吏役地保索詐又畏舊仇報復且實已無地可歸

在該犯借入伍爲保全身家之計臣等亦可因此施以束縛且現蒙

聖恩准予頂戴虛榮而伊等已自誇爲官長即使偶有反覆投入舊夥亦不能保賊之不疑此實

聖人深識遠慮控制機要尤非臣下所能仰窺萬一者至

散夥本係脅從之徒既不能如盜首之享月而終日險冒風波實有進退無歸之苦故每據線人稱說持往曉諭殺賊立功告示宣讀之時竟有聽之流涕者又來投之人往往有亟思完聚但求速放還鄉併散給銀兩亦不要領者看其情勢實形瓦

解內若無業而又無能之人每起中又不過數人
撥發各衙門充役稍有衣食謀生亦足滿其志量
查前督臣吉慶任內曾辦投首一千七百餘名將
著名各盜首安插入伍餘黨聽其自散迄今數年
其自散者未聞另有滋事之案而入伍者現如都
司林孫把總陳剛外委蔡世爵等遇賊打仗奮不
顧生又如陳添保曾受安南偽封寶玉侯自投首
之後率其子堵安插南雄極爲守法現在投首數
千人散在各屬均有收管冊檔按月點驗存亡具
報現俱安靜無事蓋粵民輕喜易怒聚固易而散

亦難於復聚好利輕生不耐勞苦臣屢試如此問
之在粵年久之人亦咸以爲然至臣年幼無才屢
奉

訓示驅策受

恩深重十餘年來亦覺少有知識固不肯瞻徇因循沾染
外官習氣但顧私已不顧公事至當大事要機必
深觀遠慮博採旁搜求其至當何敢冒昧急功致
留後患况事情重大卽已之身家性命攸關亦不
得不倍加鄭重臣愚拙之資早經

聖明洞察而爲臣子區區圖報之心合之耳聞目見實在

情事亦不得不因便陳明以上慰數千里之

慈念至在事文武出力人員統俟查明分別保奏陞賞以
爲激勸謹

奏

容安謹按此奏因 先公已解任未奉

上諭

嘉慶十年十一月初六日

奏爲紅單鹽船夾攻盜匪多名事竊照紅單運鹽船隻
素能捕盜該船多係舵工水手合資造成不肯輕
於捨棄船身靈便易於駕駛又重載水手率皆強

而有力之人洋盜頗知畏懼近因積年廢弛賊勢
旣勝該船戶等間亦有濟匪銷賊乘機謀利之事
不可不設法鼓舞招徠使其與盜爲仇而我因之
得用其力再四籌畫卽密與運使蔡共武商令僱
募此等船隻物色閒曹佐裸之有膽量及呈議呈
請自贖之武弁等押帶出洋如有獲盜者該船戶
准其抽配鹽飭各員弁許其保奏無不踴躍從事
旋據廣糧通判李臨轉據告假回籍兩淮試用鹽
知事麥紹標情願捐備二十隻親身帶領該通判
李臨捐備十隻浙江拔貢生王有壬捐備二十隻

共成五十隻聯幫協捕

臣

東上時卽留蔡共武一

面查辦鹽場口岸等事一面就近督率該船戶勦捕茲於陸豐途次接據蔡共武稟報該通判李臨帶用派委額外外委黃璋從九品趙瞻雲効用蔡草守備譚璋督率前項紅單船五十號探聞外洋有大幫匪船卽於十月十九日齊赴厓門值新會縣知縣徐鑑亦配有繪船六隻巡緝到彼通判李臨卽督同麥紹標趙瞻雲黃璋等於二十日駛至大矜洋面遇有盜船四十餘號卽上前追捕賊匪施放鎗礮互相攻擊自二十日亥時打至二十一

日寅時被傷水手十餘人各船仍抵死不退愈加奮勇將賊船打沉數隻殲斃盜匪及落水死者二百人被浪捲沒不能打撈擊住盜船二隻生擒男婦九十三名口并獲有礮火器械及賊匪圖記五等七十一名口并獲有礮火器械及賊匪圖記等物經該通判將所獲各盜發交新寧縣解省審辦并將首先過船殲獲盜匪之鹽務司事楊培徐麟候選未入流麥大生告假回籍江蘇候補主簿麥榮及船戶梁升茂等聲明前來查此項紅單船隻素能捕盜而又漸至通盜潛滋暗長大有可虞

今轉資以爲用令其與盜爲仇通盜濟匪之風不
禁自絕又許其抽配鹽引各船戶貪圖旣不致捏
報被劫亦必加倍出力且臣出省時派兵八百名
在獅子洋堵截又令西路何英之船梭巡東上又
屢次移咨撫臣督飭各文武嚴守省門中路正以
各師船分幫搜捕恐中路空虛不能放心今得此
一戰省門聲勢旣壯賊人不敢窺伺仍卽飛札蔡
共武趁此衆心踴躍之時令其且在中路香山縣
新會縣一帶督辦外洋搜剿事宜已專差曉事武
員明白告知去訊至此次出力緝捕拏獲大幫洋

盜二船及生擒盜匪之司事船戶等當卽從優捐
賞銀一千兩令卽分別給發至該通判等本無緝
捕之責竟能協力同心認真辦賊均屬奮勉可嘉
應請量加鼓勵以策後效謹將各職名開列清單
恭呈

御覽聽候

皇上施恩至目下西路各盜經臣分遣前往間諜之投誠
人嚴在綱伍大成等據稟將告示多散賊船以行
煽惑之計盜首烏石二等近日查拏手下蓄意投
首之人多行殺戮以致衆情愈形疑貳臣仍密札

各路辦理洋盜委員遇大幫先剪散其黨羽小幫
直誘惑其頭目此計既行不可如從前之有來卽
撫總須故意勒指使其改殺別賊獲獻首犯方爲
有功准其來投羈縻不絕我愈緩而賊更自內亂
內亂之時愈久則來歸之念益堅將來成功善後
亦易辦理容俟臣續辦有西路情形再行具陳謹
奏

嘉慶十年十一月二十八日奉

上諭據那彥成奏僱募紅單鹽船五十隻於大衿洋面剿
捕鹽船殲斃盜匪二三百人攻獲盜船二隻生擒盜匪

九十餘名口此項紅單鹽船係與運使蔡共武倡商倡辦通判李臨鹽知事麥紹標拔貢生王有壬捐貲僱備並從九品趙瞻雲等協力勦捕均屬奮勉懇請量加鼓勵等語蔡共武著加恩交部議敘通判李臨著賞給五品頂戴試用從九品趙瞻雲著以縣丞陞用拔貢生王有壬以州判選用鹽知事麥紹標未入流麥大生主簿麥榮均著賞給加銜頂戴叅革守備譚璋著准其開復外委黃璋著以把總補用該部知道

嘉慶十年十一月初六日

奏爲東路巨寇黃正嵩遵諭殺賊獻功率衆投誠分別

辦理事竊臣因東路惠潮一帶朱瀆黃正嵩等著
名大幫巨寇各在海豐澄海外洋寄泊據報皆有
投首之意又李崇玉一犯亦在甲子外洋遊奕必
須親自督辦勦撫事宜當於虎門舟次具摺

奏明一面分派原任提督孫全謀率領大幫丹師西下
一面催趙順德協副將李光顯帶領大幫兵船東
上惟恐中路空虛當卽預爲籌畫將投首可用之
船修整二十隻派弁帶兵八百名在獅子洋一帶
防堵以壯聲勢因臣日向東趨去省較遠一面咨
會撫臣就近督辦中路防堵事宜又飭叅將何英

帶領師船三十三隻由西路梭巡東上至新寧大

澳以爲策應各分派去後隨即改途馳赴惠潮

臣

未出省之前先據委員署佛山同知候補通判易

萬里候選通判馬鼎梅候選知縣加六品銜何天

球稟稱據監生唐芝及先來投首之林亞發袁亞

明又線人陳義勇等投稱東路黃正嵩一幫久有

投誠之念因恐夥衆未必一心必得有人前往開

導庶伊等信而有徵可使衆心鼓動即令其攻殺

就近之鄭流唐亞婆帶等幫併令設法擒拏李崇

玉爲贖罪獻功之地等語

臣

隨即密飭監生唐芝

帶領線人稟報一面導以大義黃正嵩感激悔悟
矢誓歸正適十月十五日與鄭流唐船相遇黃正
嵩卽乘黑夜之中將鄭匪一幫打沉數船擊殺多
匪當卽求唐芝上岸轉報臣伏思黃正嵩旣得罪
別幫勢不能在洋久存其失計來投必不能再有
反覆正宜乘此機會再加勅諭令殺賊立功以
堅其志因復令唐芝等傳諭黃正嵩汝所稱殺賊
情形雖有唐芝目覩但總須獲有船賊爲據方見
真心去後旋據唐芝等稟十月二十四日探知李
崇玉船到黃正嵩卽行近擊打沉拖風船一隻未

能擒獲李匪黃正嵩甚爲悞悞十月二十三口鄭
流唐又向西路邀合亞婆帶鄭保養等大船數十
隻前來尋衅報復黃正嵩率衆奮拒彼此打沉數
船互有傷夷黃正嵩船內撿點被殺二十二人正
在急迫時適有通判易萬里等先遣去之投首人
陳亞晚陳亞九及家丁張明又有黃正嵩通信定
約之張亞良等六人伏於鄭流唐船之左右接應
卽在三板船上拋擲大罐直到大船致傷鄭流唐
頭面手臂燒去鬚髭大半鄭幫大亂踉蹌駛逸黃
正嵩益加奮勇拉住亞婆帶二船殺死大頭目亞

廿二名生擒其黨數十名殺死傷重者三十五人
盡投海中留十八名口在船爲據黃正嵩再四懇
求卽於十月二十八日豎起投誠旗號駛進鯤門
并縛獻陳獲之王亞滿等十八名口又獲梗議不
法搶奪物件偷點礮火圖害全幫之許亞發許亞
晚許亞爵詹振芝等四名托唐芝等轉稟候示查
黃正嵩一幫爲獨占東路惠潮兩府洋面之巨寇
頻年勦捕未能得手今經臣督率各官并用計間
諜不特悔罪來歸且攻殺別幫盜匪三次又有縛
獻生擒之盜爲據臣初時布置原不料如此應手

今得仰仗

天威使巨寇羣歸正事機實爲順利當派肇羅道朱爾漢往鮪門督同易萬里等妥速辦理安插事宜據黃正嵩繳呈冊開各頭目散夥共一千四百二十二名婦女幼孩三十四名口開波拖風流繪等大小船三十六隻內獲獻船二隻大小鐵礮自三千至六七百觔共二十位五百觔至六七十觔共三十位柴礮二門大小百子礮一百四十一門斑鳩礮十三門共二百六門鳥鎗勾鑷馬叉藤牌長短刀各器械共一千二百七十餘件又火藥封口羣

子等件查從前唐芝等稟稱黃正嵩人材健壯頗有義氣能孝其母併云作盜須爲大盜作官須作大官要作忠臣之語臣因卽密囑肇羅道朱爾漢留心查看如果可用亦應錄取當經該道督同各委員逐一點查按名給賞分別入伍歸農復用言激試而黃正嵩果然有心報効情願殺賊立功贖罪並開出得力夥黨一百八十餘人請賞給三船作舟師頭敵該道卽一併帶領前赴海豐聽候發落并據稟稱黃正嵩之母許氏惟恐各船頭目衆心不齊扶杖親歷各船一一分付從此改邪歸正

共戴

天恩毋得少有異心等語大衆感動罔不帖服臣以其母能知大義甚屬可嘉且欲用其子不可不感其心當卽自行捐賞銀一千兩以示優異提問黃正嵩等叩頭感謝

皇上不殺之恩謹聲雷動又諭以爾等旣知改悔前非先經奉有

聖旨傳諭爾等務須勉爲良善歸農者保守身家入伍者出力報効立功此是轉死爲生關頭爾等此時只算初世爲人此後不可自悞等語當賞黃正嵩頂

戴之時伊卽先叩謝

皇上天恩後又向臣等叩頭又向伊母叩謝教導看其舉動竟不似爲盜之人當又曉諭云爾旣知孝順爾母從前在洋累汝母擔驚受怕多年今日纔得保全汝母性命汝當知出力報効

國家漸除舊日強盜名目圖個榮耀方不枉爾母撫養之恩黃正嵩不覺伏地痛哭餘人多爲墮淚無不叩頭誓願恪守

王章實力報國再有過犯願甘加倍治罪又據黃正嵩備供屢次攻殺別幫情形與該丞倅等所稟無異臣

復加慰勞并又捐賞黃正嵩銀五百兩夥衆一百八十人又捐賞銀一千兩卽令安差將其母送至省城安插仍准令黃正嵩帶得力夥衆二百餘人并再挑出一百餘人聽候派撥兵船作爲前隊出洋捕盜於緝捕經費內照兵丁例給予口糧查黃正嵩能以一千數百人悔罪來投又能屢次殺賊獲犯來獻其志可嘉誠如

睿算得收以賊攻賊之效實與前次大小各起投誠之盜有間可否仰懇

皇上特予格外

天恩賞給寶缺千總以示鼓勵而樹風聲至鄭流唐一幫被黃正嵩攻殺之後僅存七八船又復被傷甚重衆勢瓦解該匪亦願投誠因邀來之鄭保養三十餘船係鄭一幫分來助戰報仇鄭保養係鄭一之姪不能自行作主以致兩相牽制尙在游移至朱潰一幫在澄海外洋觀望與李崇玉數船忽分忽合臣查朱潰爲閩粵兩省巨寇非如粵省洋盜接濟旣少勢亦潰敗臣已連劄潮州府朱爾賡額不可求速令其來降致有失悞亦不可斷絕其來降之意且虛與羈縻相機再圖勦撫至此次在事出

力文武各員謹據實秉公開單恭呈

御覽可否加

恩陞賞以示鼓勵出自

皇上天恩其獲獻各犯除將梗議不法搶奪滋事偷照破
火圖害全幫之許亞發等四名卽飭該道等在鮑
門訊明確實就地梟首示衆外至陣獲亞婆帶幫
之王亞滿等十八名口提至海豐委員研訊親提
勘辦現在另摺專奏謹

奏

容安謹按此奏以 先公解任

諭交吳公熊光辦理

嘉慶十年十一月初六日

奏爲審明投誠黃正嵩一起打仗獲獻之別幫夥匪分別辦理事竊照東路巨寇黃正嵩率衆投首並攻殺鄭流唐亞婆帶各幫盜船陣獲亞婆帶船上夥匪王亞滿等十八名口解送上岸隨卽飭委肇羅道朱爾漢督同委員候補同知懷沅海豐縣知縣張再英候補知縣張聰思等逐一審明臣復親提嚴鞠緣王亞滿李亞明陳德才李亞三籍隸新安東莞香山王亞滿於本年正月內在洋面捕魚被

盜首亞婆帶管下副頭目亞甘擄捉過船入夥該
犯王亞滿與李亞明陳德才前後行劫三次黎亞
三行劫二次均係持刀過船搜劫十月二十三日
鄭流唐來邀亞婆帶與黃正嵩打仗報仇泄憤被
黃正嵩打敗亞甘被砍落水身死王亞滿等被拏
此王亞滿等被投誠黃正嵩拏獲獻功之原委也
譚亞雙張亞發郭亞生三犯供認被擄逼脅接贓
一次沈九子孫亞來二犯供認被擄逼脅服役並
無接贓情事江亞二張吉才蘇振和梁亞峯葉昌
謄陳溫氏王陳氏幼孩亞復亞九九名口俱係被

擄押禁艙底並無上盜等情再三究詰矢口不移
案無遁飾該犯等情罪重大未便稍稽顯戮臣審
明後恭請

王命飭委肇羅道朱爾漢署右翼鎮唐光茂將王亞滿李
亞明陳德才李亞三四犯照江洋行劫大盜照響
馬強盜例綁赴市曹斬決傳首沿海地方梟示以
昭炯戒譚亞雙等三犯接賊一次均依例發黑龍
江給打牲索倫達呼爾爲奴俱照例刺字沈亞九
等三犯被擄服役俱照例杖一百徒三年江亞二
等九名口被擄押禁應卽遞籍省釋逸犯鄭流唐

亞婆帶等嚴飭沿海文武緝拏務獲究辦謹

奏奉

硃批刑部議奏

嘉慶十年十一月二十二日

奏爲續收投誠各起分別辦理恭摺奏

聞事竊據原任提督降補都司孫全謀署左翼鎮總兵林
國良稟稱奉諭統帶兵船剿捕中路盜匪由新安
屯門後海一帶遍搜賊踪十月二十六日夜巡至
九洲洋面因風逆流急暫就關閘灣寄碇三更時
候突起大北暴風浪湧如山兵船飄散直至次日

辰刻風浪稍息二十八九兩日陸續收進澳門查點各船內龍門三號大米艇一隻被飄不見尙無著落等因臣正在飛飭確查間又據運司蔡共武稟稱前廣糧通判李臨等拏獲盜船之後奉諭仍飭將紅單各船帶赴厓門趁此衆心奮勉之時督率上緊緝捕因該處附近洋盜惟譚亞辰係內海大幫巨寇於六七八三月內屢次行劫東莞香山等五縣村墟實爲中路腹心之患該匪久思投首因勒令其殺賊立功方准免罪投首旋據該通判李臨候補鹽經歷李華鍾拔貢生王石王等稟稱

初五日午刻有伍誠發卽伍亞賢又名廣海三帶
有大拖風船一隻快艇二隻男婦九十餘名礮械
一百數十件由厓門入口投誠該通判等卽分頭
下船查看見船內有官兵礮火詢其何處得來據
稱係與譚亞辰張亞秋等船在烏猪洋面救護遭
風師船搬移過來譚亞辰隨後就到尙有官兵十
人在彼旋有司事梁大彩線人陳善操帶同譚亞
辰駛駕大開波拖繪齊桅拖仔大小船五隻礮械
二百餘件前來據譚亞辰供稱中路現有紅單多
船搜捕久欲投首因罪重無可自贖心裏害怕經

陳善操來船傳諭開導卽與伍誠發卽廣海三張亞秋卽廣海四等相商情願聯爲一幫希圖獲賊進獻二十八日在烏猪外洋見有風飄兵船一隻並無桅柁有小賊船數隻紛往搶奪船亦將次沈溺官兵正在危急之時當卽隨同梁天彩陳善操并催齊伍誠發張亞秋各船趕上將賊船打散先將官兵救取過船隨又搬取礮械未及搬完兵船業已沈沒是時風浪狂大救護情急不及兼顧自船以致打壞快艇三隻只得丟棄張亞秋二船桅柁俱折不能緊跟隨後趕到一同投首懇恩錄功

免罪并送上兵船內之千總徐煥章一員及兵丁
五十一名獲回一千觔至三百觔生鐵礮八位劈
山子母礮等五門封口羣子二千六百餘個火藥
一千二百六十四觔又網洲起獲賊船小鐵礮一
位鎗三十件其餘不及搬回六百觔生鐵礮一位
子母礮一門又封口羣子鉛礮火藥火繩噴筒磚
箱腰刀簾牌鑼鼓旗幟等多件俱被沉失又兵丁
鍾維麥得英張文竟三名撈救無蹤等語當經該
運司在新會查辦卽傳救回之千總徐煥章及兵
丁等訊取供詞與譚亞辰所稱無異派委徐煥章

將各頭目帶來聽候辦理又據潮陽縣唐文藻稟
收得盜首羅友等大船一隻男婦三十三名口礮
火器械各件現飭照舊分別辦理安插查此次投
首內譚亞辰伍誠發張亞秋救獲弁兵五十二人
併搬回礮械多件悔罪立功應加優獎可否仰懇
聖恩譚亞辰准其免罪與伍誠發張亞秋均給予額外
委名糧以示鼓勵出自

皇上天恩謹

奏

嘉慶十年十一月二十二日

奏爲遵

旨查明辦理據實奏

聞事竊

臣

上年蒙

恩調任兩廣之時接奉

上諭飭查洋匪逆詞內僞號僞官僞印自必有一謀逆爲首之人務須不動聲色密行訪察得有確實踪跡設法偵緝務獲兇渠欽此

臣

自到任以來遇有獲犯降匪莫

不留心盤詰人人異詞毫無確據嗣於廣州灣攻捕賊匪搜出賊船中約單一紙係鄭文顯麥有金吳智清梁寶鄭流唐郭學憲李湘清等七人公立

尾註奉主公命傳諭及天運乙丑字樣甚爲狂悖
閱之實堪髮指但不能確查主公究係何人未敢
冒昧上竇仍恪遵

聖諭不動聲色隨時訪查昨於潮州案內解到入伍之黃
德興查係鄭文顯幫內管賬財富臣看其人頗明

白細訪七幫情形據稱鄭文顯卽鄭一係從前大
頭目鄭七之弟麥有金卽烏石二吳智清卽東海
伯梁寶卽總兵寶鄭流唐卽鄭志同郭學憲卽亞
婆帶李湘清卽金牯養多係安南阮光平舊人自
其子爲阮福蔭所併有號稱安南三太子者帶長

髮夷人數百竄過鄭一烏石二幫內年紀二十上下各大頭目十分崇敬各幫商議想要扶他奪取安南去年冬間曾帶盜船數百餘號由夷洋進汴山前打東京不勝而退今年寄信約會福建之蔡牽朱瀆同到西路合幫等語又據投誠黃正嵩幫內之財富杜芝英供稱夷艇厯來皆住安南自寶興破後都無所歸蔡牽獨爲富足常說臺灣汛兵不能當他今年六月有書來叫李崇玉朱瀆又寄信與鄭一烏石二說引下面兄弟上北相會等語因知其單內所稱主公爲阮氏遣孽無疑但未審

鄭一烏石二各幫其共相附從者何意旋據五年
投首入伍之陳剛蔡世爵等稟稱從前阮光平造
亂之始內謀黎氏外抗官兵用其親信莫官扶鄭
七等假以偽封給與船隻礮械號爲艚長每年三
四月連幫東上至九十月收鰲西下粵閩江浙各
洋小盜稱爲粵南大老板擄掠所獲阮光平抽分
銷贓各幫均皆獲利等語臣核對各幫盜首懷阮
光平勾結私恩數年以來屯泊安南界地方聚衆
劫糧一遇官兵輒駛避不輕接仗於內地亦不敢
違犯總緣志在安南爲養精蓄銳之計不肯少有

捐失但其志旣堅其謀頗狡萬一奸計得逞則憑
安南爲巢穴進戰退守師阮光平之故智圖收洋
利東南財賦之地難免流毒卽令其所謀未遂而
寄泊無所與蔡朱二賊相合亦恐東趨臺灣擾害
滋大臣愚昧之見以粵省近年民間十分疲敝不
可輕議用兵損傷元氣且茫茫巨浸風濤不測尤
未便驅使大衆而沿海數千里處處口岸長兵
單亦實有防範難周之處再四躊躇爲不得已之
計乘此接濟遏絕之時賊心攜貳廣行間諜大幫
則分析其夥黨小股則利誘其頭目賊勢漸次解

散阮氏遺孽及鄭一烏石二各巨魁其勢旣孤設
法搜捕一鼓咸擒庶煽惑之罪可正而邊患亦隱
消於旣萌臣受

恩深重遇有此等大事不肯稍涉矜張亦不敢畧存推諉
謹

奏

嘉慶十年十一月二十二日

奏爲疊劫內河巨匪臨陣投首從嚴辦理緣由恭摺奏
聞事竊照本年五月初九閏六月初一二十六七等日有
賊船在新會縣屬之新前村番禺縣之大力沙石

子頭順德縣屬之勒樓黃連香山縣屬之港口東莞縣屬之焦門等處或登岸焚劫或擄殺人口或將次攏岸被兵勇放礮拒退節據稟報各情事節經臣嚴飭查拏疊獲各犯現在省中審辦分別歸案具

奏查各該處俱係內河逼近省會賊匪敢於滋擾殊屬目無法紀前於拏獲各犯內訊係盜首李英芳譚亞辰林亞發等幫之船李英芳本係革退書吏逃竄入海就近內河一帶出入伺劫尤爲狡猾因專派原任提督降補都司孫全謀署左翼鎮總兵林

國良統領兵船六十號從虎門出口肅清中路近
海賊匪並飭運司督派紅單船隻前往協捕適訪
聞李英芳等現竄橫山銀潭一帶又經飛札飭拏
去後茲據孫全謀等報稱遵諭帶領兵船自河角
開巡至新安屯門後海各處搜捕未見踪跡二十
六夜兵船遭風飄散陸續歸幫間需整理又另僱
魚船暗配兵丁四路密訪哨探隨有投誠兵丁謝
經道及運司差探之署千總陳剛回稱盜首李英
芳現在三窟各洋當卽前往兜捕迨駛抵該處望
見賊船放礮轟擊卽據謝經道帶領盜首李英芳

料船一隻男婦共四十六名口頭目陳亞三快艇
一隻男婦三十三名口前來跪迎哀懇投首繳呈
礮火器械過船當將李英芳留在兵船同餘人押
至香山縣送候查辦並據運司蔡共武稟稱李英
芳本有船十餘號因二十六日被風擊散僅存大
小兩隻另有同夥盜首馮廷芳併頭目李勝伯二
船男婦四十三名口盜首張志紳等男婦三十四
名口現在一併投首等語查李英芳疊次劫擾內
河罪無可貸且係臨陣方來投首與首次各起不
同自應從嚴辦理不能因其悔罪乞恩稍從末減

李英芳一犯應俟該運司委員解到時卽照強盜不准自首之例立正典刑以除積患餘夥中仍確切研究分別辦理庶於收撫之中仍不使渠兇僥倖漏網方足快人心而昭

國憲以仰副我

皇上明罰勅法之至意謹

奏奉

硃批所辦甚是

嘉慶十年十一月二十五日

奏爲官兵連日痛勦並拏獲盜匪多名恭摺奏

聞事竊臣自十月中旬出省查閱中東路營伍並督辦剿捕各事宜嗣因仰仗

皇上鴻威黃正嵩輸誠効力劉唐伯亦既就撫李崇玉全家誘獲東路去此巨寇則無大幫賊匪洋面已就肅清惟中西路各幫巨賊臣尙未及往辦正恐臣

在惠潮東路或恐乘機滋擾臣當飭左翼鎮臣林

國良原任提督降補都司孫全謀等率領舟師速

行西下乘此賊勢惶惑心散之時盡力攻剿務挫

其鋒則於全局更有裨益臣在潮州於二十三日

得信知

欽差督臣吳熊光已於十一月十八日抵省臣當卽於二

十四日起程回省途次接據鎮臣林國良等於十

一月初十日在新寧外洋探得張保之船三十餘

隻在大澳一帶灣泊當卽督兵往捕賊匪恃衆竟

敢放礮對敵自午至酉打死多名獲船十隻獲賊

二百一十二名賊猶不肯散走海霧迷漫黑夜不

能分辨至次日天明賊匪猶敢前來抗拒我兵乘

勝奮勇攻剿又復打死多名獲船七隻獲賊一百

三十九名等情前來臣查此次連得勝仗獲船十

七隻賊三百五十一名器械無算查此幫卽係張

保賊中最稱驍悍者今痛剿此幫則其餘賊匪更可聞風膽落計自臣出巡一月之內前後三起共得有五百餘人打死傷斃者千數百人現在士氣奮興踴躍百倍從此鼓銳西下以乘勝之師攻已心散之賊不難陸續殲擒仰副

皇上綏靖海隅之至意至拏獲盜犯飭審解辦及此次出力官兵移交

欽差吳熊光查明辦理合先馳奏仰慰

聖懷謹

奏

容安謹按以上各奏未載

硃批者均因先公已解任奉

諭旨交吳公熊光查辦

告示附

示爲通諭口岸接濟白首免罪事照得通洋接濟
朝廷禁令森嚴濟盜之罪與通盜一律本部堂飭各州
縣購線查拏已不下百餘起均卽分別嚴辦惟於
詰奸誅暴之中憫斯民身罹法網未嘗不盡然心
傷卽如洋賊不自知其爲劫盜罪不容死而自號
曰行綱接濟之奸不自知其通盜罪不容死而自
號曰掛車連日以來本部堂親詢投誠人等據供
洋面如今十分窮蹙盜首人人自危擄得水手禁
押艙底行船方許放出收藏器械禁止私語防有

內變每日僅得稀粥一頓在船度日如年過沙淺處多赴水逃走等語又委員查勘投誠各船逢損漸已得壞破位不堪施放子藥短缺則該匪伎倆大概可知現在整飭舟師鄉勇不難一鼓成擒特以

皇上天恩浩蕩助逆者誅順命者赦如爾等水手舵工能謀殺盜首係有功之人固然重賞卽梟水逃走之人情亦可矜但報明該處保正鄉長稟縣報案亦可貸其一死因思盜賊既有投誠之例則接濟各犯或因父兄親戚被擄不得已而贖水或因住居

近海畏賊劫掠不得已而貿易亦實情處無奈宜酌予自新之路查爾等住居口岸平日慣行接濟之人必與賊情面熟習當此賊困之時賊或潛行上岸託買糧食什物或將所蓄財貨寄頓爾等店家其意不過急則投誠緩則仍颺海外此賊之奸計爾民或未盡知本部堂再爲網開一面許爾等平日接濟之人亦得自首免罪合行出示曉諭爲此通諭沿海口岸民客知悉爾等卽有平素與賊往來熟悉者此後如有賊匪到爾店家託爾貿易向爾寄頓卽用計誘住暗通鄰佑將賊縛送到官

不惟免爾從前通賊之罪卽將賊貿易寄頓之貨
銀分賞爾等出力之人如此辦理賊智無所復施
洋面自然靖謐商舶通行沿海口岸生意自然興
旺且有水手舵工誘同盜賊到店暗通店人擒拏
者亦卽加倍優賞此本部堂一片曲全爾輩苦心
如此番曉諭之後仍復怙惡徇情一經拏獲賊匪
供出在何店家貿易寄頓查明並未出首立即委
員飛騎擒拏分別正法决不寬貸各宜凜遵切切
毋違特示

示爲嚴禁私帶棕藤蒲包出口以杜接濟事照得

粵東各屬大半濱臨洋海處處與外洋相接岸匪最易勾通節經本部堂嚴飭文武員弁密拏接濟以盡根株查米糧因爲日用所必需而海船無三月不換之篷帆蒲包棕蔴爲篷帆需用之物若果禁止不能下海則雖有船隻篷帆敗壞不能駛行船隻亦爲廢物實爲坐困之良策是嚴禁蒲包棕蔴應與接濟米糧並重合行嚴切示禁爲此示諭沿海居民人等及守口員弁兵丁知悉嗣後如有漁人船戶及岸上居民人等如敢私運蒲包棕蔴等物出洋者一經查出卽照通盜例從重究辦或

守口員弁私放賄縱亦卽一體嚴行叅辦本部堂
言出法隨決不稍爲寬貸各宜凜遵毋違特示
示爲通諭裏脅難民殺賊投誠立功贖罪事照得
我

國家

重熙累洽凡在食毛踐土莫不感沐

皇仁詎有么膺小醜出沒島嶼不安耕鑿自外生成本部
堂總率師干肅將

天討現在調集水陸官兵招募民蛋鄉勇一十餘萬添修
艚船米艇僱募紅單白槽各項出洋船隻千有餘

艘刻期分途進剿我武維揚取鯨鯢以爲戮罪人
斯得將玉石之俱焚因思賊船人衆各色不齊本
部堂於獲賊降人面加訊問查有因買賣折本失
計入賊有因冤抑未伸懷憤投夥有因親屬被拘
勒贖被留有因搶掠人口年壯服役有因廳知風
潮因能見誘被裹之始禁壓艙底絕其飲食不從
則殺死拋下大海勒以不得不從諸如此類多係
有家口田廬之人自裹脅入海飄蕩經年雖在盜
賊之中豈無生歸之念特以被賊拘束不能脫身
又恐逃走上岸兵役捉拏遂爾偷延窮洋本部堂

憑

神武之威靈詎容怙惡體

皇恩之浩蕩不絕自新爾賊黨中果有被賊裹脅恨賊殘
暴情願投誠者准其逃出地方投明該管里長保
正帶領到官捐給口糧遞送到籍傳喚戚隣保認
卽時釋放如中有豪傑能用智力陰糾同志將著
名首逆用計擒縛砍殺或說誘謀主出降又彼此
均係大頭目能於別股大頭目相會之時誘擒投
降均卽奏予官職其沿海貿易人等向因住居海
岸畏賊擾害潛相交易或領賊資本上岸購買此

時退賊至知其停泊之處誘其同來之伴指
引本地勸練兵役設法拏獲卽加以重賞寬其平
日接濟之罪現據吳川縣稟有黃亞金等十人殺
賊投首新寧縣於六月十四日有潘長洲等七人
細縛賊目朱佳成投首海豐縣於四月二十七日
稟有鄭章成被擄服役不甘乘間殺賊投首海豐
縣鵬準司所管於前月二十六日有許亞內林亞
剛等八人殺賊三名投首本月十三日有胡亞發
張榮光等二十五名將盜首紅痣狗殺死攜帶賊
船大礮器械投誠前來本部堂當飭地方官將投

誠人等優加獎賞願入伍者拔補名糧願回籍者
給賞口糧護票以逋逃之窮寇倏爲忠義之良民
禍福轉關只爭一念人鬼分路不在多時刻下大
兵雲集賊黨中似此亟圖拔出者自應不少但恐
未能周知未免中存疑畏合行出示曉諭爲此通
諭陷賊人民知悉爾等能乘間殺賊逃出地方官
給予口糧遞送回籍兵役能帶投誠人報官與拏
賊一體獎賞如果能用計縛拏賊首賊夥分別獎
賞其大頭目誘拏別股大頭目帶率船幫投誠大
頭目奏予官階夥黨重賞安插平日與賊貿易之

人能指引泊船處所誘拏同來夥件亦卽宥其前愆地方官於海岸百姓機巧有用者不妨故貽賊擄假作接濟與賊往來反行間諜互相開諭此本部堂於除暴誅亂之中開爾等一線生路各宜猛省轉災爲祥若再執迷不悟大兵所指巢穴立傾駢首同戮決不能再邀寬宥凜之毋違特示示爲通諭各洋快馬頭人舵工水手殺賊立功勉邀恩賞事照得粵東洋面不靖經本部堂嚴飭各州縣將沿海口岸接濟概行禁絕調集水陸官兵僱募民蛋勇壯分投兜勦搗巢犁穴無難尅期肅

清但兵勇所至玉石俱焚本部堂節制一方爾等
均我赤子念現在盜船多有被賊裹脅禁押逼於
饑寒並非甘心從賊是以仰體

皇仁出示招諭七八月來投誠之人接踵而至如會州之
胡亞發李宗會許亞內袁亞明韓斗鳳陳五新安
之林亞發順德之馮亞連潘長洲陽江之麥亞荷
歸善縣之吳亞興李福生沈世傳張長貴澄海之
黃亞四等共計數十起男婦二千餘名均卽曲施
寬宥妥爲安頓投誠人等平日擔驚受恐得復爲
太平良民安居樂業莫不歡聲載道本部堂於投誠之

快馬頭人舵工水手逐一面加訊問據稱各處快馬所得貨物各船掛單港規銀兩雖盈千累萬總歸大老板掌管與他幾個心腹享用快馬有陰瞞者快馬卽欲砍殺將船燒燬各幫只有口糧並無一毫蓄積如今接濟路絕米糧不能下船有錢無市曰加窮蹙遇有官兵客船打仗都是我們當先受死福則老板獨享禍則我輩先當心中實是不甘是以懇恩投誠等語本部堂查各快馬頭人與舵工水手萍寄窮洋本屬無利可圖迫於老板威勢不能自拔實可憐憫試思各盜首有何好處到

汝等現在各夥受苦老板等坐擁多貲急宜乘大
兵攻剿之時趁老板不能自顧結伴投出合再出
示明白曉諭爲此通諭快馬頭人各舵工水手等
知悉爾等果能悔過自新如林亞發袁亞明韓斗
鳳等帶領船隻礮械投誠者爲首之人賞給把總
頂戴共謀之人賞給外委一同投出之人均恩賞
銀兩願投効者給予馬步名糧願歸農者給予路
票各歸本籍如能照李宗會李福生胡亞發等將
大老板殺死卽將大老板船內一生所蓄貨物分
給出力之人其設謀之首同下手者照軍功例奏

賞千總把總官職帶來夥件加倍獎賞地方文武
不許阻撓冒功兵役人等不許到船騷擾現均如
此辦理再往日投誠之大頭目陳添保陳剛黃久
海蔡世爵等皆已拔補千總把總作本部堂轅門
差官聽候差委何等風光爾等想已傳聞至李崇
玉一犯本係會匪又爲充軍逃犯與爾等不同罪
愆重大

朝廷指名捉拏之人奉懸賞格探有李匪確信者賞銀
一百兩用計誘住指引官兵擒拏者賞銀一千兩
能首先下手擒送到官者賞銀一萬兩奏予水晶

頂戴李匪到洋不久黨羽無多伊係得罪

朝廷拋棄老母妻子隻身逃走不忠不孝爾等能爲

國家出力便爲忠臣義士又可立功作官有何疑懼不
思奮勉爾等果能醒悟或就地方文武或尋相熟
紳耆懇其代爲呈請或有安人徑赴本部堂行轅
遞呈投誠卽委官接辦不令爾等守候喫虧毋再
觀望有負本部堂肫切開導之心也切切毋違特
示

示爲招諭紅單各船協力殺賊以通行商以裕生
計事照得殄滅寇盜綏靖邊疆全資兵威亦仗民

力本部堂從前辦理博永曾匪深悉民情因思海
洋盜賊伎倆只同鼠竊而遊奕數載久稽刑誅者
不過以鼓柁揚帆上下風濤之內往來島嶼之旁
師船跟踪東剿則西竄南追則北逸非不能用我
搗犁未免阻其出沒本部堂博採輿論披覽士民
條議均稱本省蛋民以江海爲田廬以舟艇爲家
室鳧水弄潮極其便利而紅單船一項其船多係
合夥朋修裝運貨物所獲贏餘舵工水手均得公
分本爲同財共命之心莫不齊心協力近因賊匪
充斥擾害江洋該船修理堅整尤爲洋盜所垂涎

往往併力追劫奪其船隻視人貨之多寡定勒贖之重輕舵工水手逼令服役稍不如意卽行殺死拋屍海中家屬尙不知信船戶大小婦女姦占輪宿並無放回貨貨旣已虧折人命復難保全莫不恨切骨髓懷報仇雪恨之心而地方官於該船戶苦害情形旣鮮據實稟報於裝運貨物又恐其遭劫遺累不輕放行以致株守坐食困頓無聊本部堂念茲船民均我赤子遭賊匪如此荼毒被賊匪如此凌辱不勝切齒業已廣修戰艦整飭水師出洋搜捕亟思戮其鯨鯢冀得拔諸水火該船戶等

既懷自畏之心兼切同仇之志正可幫同官兵殺賊立功合行出示曉諭爲此曉諭紅單船戶人等爾等有情願出洋殺賊者約會數船十數船公議家道充裕辦事明幹之人爲首呈明該管府廳州縣將船中舵工水手姓名居址並軍械器具造實清冊探明賊匪灣泊官爲給發執照徑前搜捕如能拏獲著名大盜多殺賊匪立將爲首之人奏予職銜頂戴願入伍者卽行拔補幫同出力之人賞給銀兩其沿海大小漁船爲賊所苦不能漁捕者亦准稟地方官照依辦理查現在接濟之禁旣嚴

賊匪無糧可食爾等以諳習水道之人攻饑疲日久之賊自易得手地方官察其恫怵好爲鼓勵則辦賊之方卽爲保民之政一應投冊請照無任書役需索壓候該船戶等惟有黽勉從事俾洋面早清一日則可早營一日生計此後坦行無警俯仰有資豈非商民之福毋得假托捕盜爲名夾帶犯禁之物自干罪戾切切毋違特示

示爲曉諭沿海漁戶協捕盜匪事據新安縣稟報五月二十三日有漁戶陳建壽歐聲耀等稟稱該漁戶隨同兵勇出洋巡緝見有匪船十隻駛入鯤

魚門伺劫卽便合力追勦奮勇圍捕打沉盜船三隻獲盜陳亞甲葉二湖等三十二名當經本部堂飭令該縣傳齊出力漁戶當堂給賞陳建壽姚開瓊二名將所獲船隻及鹽觔二十餘石盡數給賞外仍各賞銀五兩歐聲耀鄭成絢張德金鄭有發鄭全滿吳德利六名將賊船給賞外亦各賞銀五兩受傷漁戶鄭亞長鄭亞五馮亞九三名除經該縣撥醫調治外另各賞銀十兩并令該縣逐一詢明該漁戶等如有願行入伍者卽行給與民糧用示獎勵在案查各屬沿海漁戶以海爲生終朝採

捕涉厯風濤藉覓微利情殊可憫一遇匪船遊奕
往往連船擄去逼脅爲盜致令安分百姓陷於匪
黨身犯刑章實堪痛恨因思爾等漁船沿海生理
自一二十隻至數十隻不等人船不少朝出暮歸
聲勢亦易聯絡且終年在洋水性熟悉如果隨同
官兵奮勇緝捕何難擒獲匪徒卽盜船往來踪跡
亦易於偵探其有欲近岸圖劫者儘可預先報知
官兵早爲堵禦若虛日後出洋盜船報復爾等於
獲盜後本部堂准其補食名糧毋須再行揀捕亦
何憚而不爲爲此明白示諭嗣後爾等船隻出洋

必須聯屬同行歸港一律灣泊遇有盜警官兵在岸防堵及配駕船隻出洋截拏爾漁船水手人等卽協同跟隨實力擒捕如得獲有盜匪立即優給賞銀願入伍者卽行拔補似此同心奮勉庶盜匪知所畏懼不敢近岸爾等亦得安居樂業經示諭之後爾等遇當防盜之時漠然不顧查出定當究懲如不肖書吏及守口弁兵因此封派爾等船隻藉稱防禦及勒令爾等出洋捕盜爾等指名首告卽當立予嚴辦不稍寬貸也特示

示爲諄切訓誠事照得爾等投首之人從前出沒

海洋打單行劫犯的都是死罪今年因斷了接濟
無糧可食又怕官兵四面兜剿拏住了便要劓要
殺央煩線人懇求礮臺武官情願悔罪來投本部
堂俯憐爾等均是無知赤子仰體好生之德不忍
殺戮奏明

皇上赦了爾等罪過格外又加

恩典賞給安插銀兩入伍者准其當兵歸農者送其回籍
是爾等本係該死之人如今予爾再生之路不死
之外又有頂戴便宜時時刻刻頂祝

天恩本部堂見各頭人跟隨行部左右服役一種貼服依

戀情形心中甚是歡喜就如父母疼愛兒子一般
但是父母疼愛兒子也要兒子學好做個好人爾
等本是良民並非生成狼子野性如今投了誠便
要想着悔罪二字把從前罪過盡行改悔要知忍
氣不可打架鬪狠要知安分不可妄作胡爲要知
勤儉不可好喫懶做不要酗酒酒多亂性不要喫
鴉片烟成了引便是廢人不要攤館標館去賭賭
了要輸不要生事規矩矩安安静静歸農者做
好百姓娶妻生子成了家當共享太平入伍的做
個好兵丁聽將官的約束替

朝廷出力便可做官榮宗耀祖爾等若肯聽此教訓就不辜負本部堂救拔爾等婆心若不知悔悟動輒向人爭競旁人必然恥笑爾等強盜舊性不改倘若闖出禍來爾等本是有罪之人就要加倍治罪再無生理本部堂就疼愛爾等也沒法了再本部堂此番費了多少苦心擔了多少嫌疑救了爾等的命爾等衆口一詞說是爾等重生的父母一樣的爾等既知是重生父母卽當知恩報恩從今以後爾等安分者安分出力者出力這便是本部堂在皇上前也算出力爾等如不改舊性生事擾害或反復不

常就是我辦理不善連我也擔了不是豈不是以
仇報恩爾等既是歸正之人豈無人心豈無義氣
能知孝自己父母便莫忘重生父母之恩爾等若
不聽也只好由爾天上有颶風海裏有大浪礮中
有熱火豈肯放過無人心無義氣的人況且我敢
於收你們敢於放你們敢於用你們敢於帶你們
在左右前後我也是必能辦你們的若有事故我
也再不饒放你們的本部堂血誠肝膽言言透骨
字字抒心看爾等實有一番赤子感戴父母之誠
心故痛切曉示爾等均須觸目警心毋負本部堂

救拔爾等訓誡爾等之意勉之凜之切切毋違特

示

邠文毅公兩廣總督奏議卷十三